

## NORŨ TAXRE GA POPERA GA CORÍTIUCŨĂX GA YAXŌGŨXŨTANŨWA NAMUXŨ GA PAURŨ

*Pauru rŭ nŭxŭ narŭmoxĕ* ga yema yaxŏgŭxŭ ga Corítuwa yexmagŭxŭ

<sup>1</sup> Pa Chaueneĕgŭ i Corítuucŭăxgŭ i Tupanaăxŭ yaxŏgŭxŭ, rŭ Pa Chaueneĕgŭ i Guxŭma i Acayaanewa Ngĕxmagŭxŭ, choma i Pauru nixĭ i pexcĕx chanaxŭmatŭxŭ i ñăă popera wŭxigu namaă i taeneĕ i Timutĕu. Rŭ choma nixĭ i Tupana choxŭ yaxuxŭ na Ngechuchu ya Cristu choxŭ muxŭ na nŭxŭ chixuxŭcĕx i norŭ ore. <sup>2</sup> Rŭ tanaxwĕxe na Tanatŭ ya Tupana rŭ tŏrŭ Cori ya Ngechuchu ya Cristu pexna nanaxă i norŭ ngechaxŭ rŭ norŭ taăxŭ.

*Pauru rŭ ngŭxŭ ninge*

<sup>3</sup> Rŭ toma rŭ nŭxŭ ticuĕxŭŭgŭ ya Tupana ya Nanatŭ ya tŏrŭ Cori ya Ngechuchu ya Cristu. Erŭ nŭma nixĭ ya Tanatŭ ya nŭxŭ ingechaŭtŭmŭŭgŭcŭ rŭ tŏrŭ Tupana ya guxŭguma tŭxŭ taăxĕĕcŭ. <sup>4</sup> Rŭ nŭma ya Tupana rŭ toxŭ nataăxĕĕ i ngĕxguma ngŭxŭ tingexgu, na toma rŭ ta tanataăxĕĕgŭxŭcĕx i ngĕma togŭ i duŭxŭgŭ i ngŭxŭ ingegŭxŭ. Rŭ ngĕmaăcŭ ngĕma Tupana toxŭ na taăxĕĕxŭrŭŭ toma rŭ ta tanataăxĕĕgŭ i ngĕma togŭ i duŭxŭgŭ. <sup>5</sup> Rŭ ñuxma na Cristurŭŭ poraăcŭ ngŭxŭ tingegŭxŭ, rŭ ngĕxgumarŭŭ nŭmatama poraăcŭ toxŭ

nataãẽxẽẽ. <sup>6</sup> Rũ ngẽmacèx, ngẽxguma toma ngúxũ tingegũgu, rũ ngẽmaãcü toxũ nangupetũ na pema rũ pexũ nangẽxmaxũcèx i perũ taãẽ rũ perũ maxũ i taguma gúxũ. Rũ ngẽxguma Tupana toxũ taãẽxẽẽgu, rũ ngẽmaãcü tomaã nanaxũ na pema rũ ta pexũ nangẽxmaxũcèx i perũ taãẽ rũ yaxna namaã pexĩnüẽxũcèx i ngẽxguma ngẽmatama ngúxũ i toma tingegũxũ pexũ ngẽxmagu. <sup>7</sup> Toma rũ aixcũma tayaxõgũ na pema rũ tagutáma ípenatáxũ i Tupanaãrũ ore. Erũ nüxũ tacuèx rũ ngẽma na toxrũũ ngúxũ pingegũxũ, rũ ngẽxgumarũũ tá ta toxrũũ pexũ nangẽxma i ngẽma taãẽ i Tupanawa ne ũxũ. <sup>8</sup> Pa Chaueneẽgũx, tanaxwèxe i nüxũ pecuèx na ñuxre ga guxchaxũgũ toxũ ngupetũxũ ga Áchiaanewa. Rũ yema na poraãcü toxũ naguchaxũ, rũ düxwa marũ tama namaã taporae, rũ nagu tarũxĩnüẽ na marũ tãütáma tamaxẽxũ. <sup>9</sup> Rũ nagu tarũxĩnüẽ rũ ñoma yuwa taxĩxũrũũ tixĩgũ. Natürũ yemaãcü toxũ naxüpetũ, erũ Tupana ya yuexũxũ írüdagũxẽẽcü toxũ nangúexẽẽchaũ na nüxĩcatama nüxũ nangẽxmaxũ i pora na yuwa toxũ ínanguxũxẽẽxũcèx, rũ taxucürũwama togütama na ítanguxũxẽẽxũ. <sup>10</sup> Rũ Tupana rũ toxũ ínanguxũxẽẽ nawa ga yema guxchaxũ ga yuwa toxũ gagũchaũxũ. Rũ ngẽxgumarũũ tá ta toxũ ínanguxũxẽẽ nawa i ñaã taxũ i guxchaxũ i ñuxma toxũ ngẽxmaxũ. Rũ aixcũma tayaxõgũ na nüma rũ guxũgutáma ngẽmaãcü toxũ nangúxẽẽxũ. <sup>11</sup> Natürũ tanaxwèxe i pema rũ perũ yumũxẽemaã toxũ perũngũxẽẽ. Rũ ngẽxguma chi ngẽmaãcü penaxũxgux, rũ muxũma i duũxũgũ rũ tá Tupanana moxẽ naxãgũ naxcèx i ngẽma na ñuxãcü toxũ nangũxẽẽxũ.

*Tüxcüü tama Corítiuwa naxü ga Pauru*

<sup>12</sup> Nangëxma i țacü i toxü taãëxëëxü. Rü ngëma nixĩ na toõewa nüxü tacuáxü na ñoma i naãnewa rü aixcúma Tupana naxwëxexüácúma meã tamaxëxü. Rü pepéxewa nixĩ ga guxüãrü yexera yemaãcü tamaxëxü. Natürü tama togagu nixĩ ga yema, yerü Tupana ya tomaã mecümacü nixĩ ga toxü rüngüxëëcü na yemaãcü pepéxewa tamaxëxücèx. <sup>13-14</sup> Rü yema poperagü ga pexcèx taxümatüxüwa, rü nataxuma ga țacü ga icúxü. Natürü yema toma tamaxëxüácúma nixĩ ga pexcèx tanaxümatüxü na yemawa meã nüxü pecuáxücèx na ñuxäcü tixigüxü. Rü woo i ñuxma rü tama aixcúma meã toxü na pecuáxü, natürü chanaxwëxe i wüxi i ngunexügu rü aixcúma meã toxü pecuèx. Rü ngëxguma meã toxü pecuèxgu rü pema rü tá tomaã petaãëgü i ngëxguma ínguxgu ya tórü Cori ya Ngechuchu, rü ngëxgumarüü i toma rü tá ta pemaã tataãëgü. <sup>15-16</sup> Rü yemagu charüxĩnücèx nixĩ ga noxri ga pexütawa na chaxüxchaüxü na pexü íchayadauxücèx rü yemaãcü pexü na charüngüxëëxücèx. Rü nagu charüxĩnü ga Machedóniããnewa chaxüxgu na pexütagu íchidauxü, rü yexguma Machedóniããnewa ne chaxüxgu rü wenaxãrü pexütagu íchidauxü. Rü yemaãcü chanaxüxchaü, yerü nagu charüxĩnü na yemawena choxü perüngüxëëxü na Yudéaanewa chaxüxücèx. <sup>17</sup> Bexmana pema nagu perüxĩnüëgu rü tama aixcúma chayan-guxëëgaãcüma nagu charüxĩnü ga yema pexütawa na chaxüegaxü. ¿Ëxna pema nagu perüxĩnüëgu rü ñoma wüxi i duüxü i tama Tupanaãxü yaxõxürüüácúma chamaxü, rü “Ngü” ñacharügüchiréx woo tama chayan-guxëëgagu i ngëma nüxü chixuxü? <sup>18</sup> Natürü Tupana

toxũ nacuèx na aixcũma yĩixũ i ngẽma torũ ore ega pemaã itaxunetagu. <sup>19</sup> Erũ yima Ngechuchu ya Cristu ya Tupana Nane ga guma Chiribánu rü Timutéu rü choma pemaã nüxũ tixuchigacü, rü ore i aixcũma ixĩxũxĩxi-catama nixu. Rũ nüma rü aixcũma nayanguxẽẽ i ngẽma nüxũ yaxuxũ. <sup>20</sup> Rũ Cristu nixĩ ya yima yanguxẽẽcü ga guxũma ga yema unetagü ga Tupana nuxcũmaxũchi nüxũ ixuxũ. Rũ ngẽmacèx ngẽxguma Ngechuchuégagu Tupanaxũ icuèxüũgügu, rü ñatarügügu:

“Rũ aixcũma nixĩ i ngẽma”, ñatarügügu. <sup>21</sup> Rũ ñuxma na Cristuarü duĩxũgü ixĩgũxũ, rü Tupana nixĩ ya toxũ poraexẽẽcü rü pexũ poraexẽẽcü na taguma Cristuna ixĩ-gachixũcèx. Rũ nümatama nixĩ ga tüxũ nadexũ na noxrü ixĩgũxũcèx. <sup>22</sup> Rũ nüma ya Tupana rü naega tagu naxü erü tórü yora nixĩ. Rũ nüma rü tüxna nanamu i Naãẽ i Üünexũ na wüxi i tórü cuèxruũ yĩixũcèx, rü ngẽmawa nüxũ icuáxũcèx na yixcũra tá tüxna naxããxũ i muxũma i to i mexũgü. <sup>23</sup> Pema nüxũ pecuèx ga noxri rü Corĩtiwa chaxũchaũ, natürü tama yéma petanüwa chaxü yerü tama chanaxwèxe na pexũ changechaũgũxẽẽxũ. Rũ yemacèx tama pexũtawa íchayadau, yerü tama pexũ chingagüchaũ. Rũ Tupana nüxũ nacuèx na aixcũma na yĩixũ ga yema. <sup>24</sup> Rũ tama tanaxwèxe na pexũ tamuxũ na ñuxãcü tá Tupanaãxũ peyaxõgũxũ. Erü pema rü marü aixcũma meãma peyaxõgü. Natürü ngẽma tanaxwèxexũ nixĩ na pexũ tarüngũxẽẽgũxũ na yexeraãcü petaãgũxũcèx.

## 2

<sup>1</sup> Rũ yemacèx nixĩ ga tama wena pexũtawa chaxũxũ, yerü tama chanaxwèxe ga pexũ na changechaũxẽẽxũ.

<sup>2</sup> Erü ngëxguma chi pexũ changechaũxëẽgu, ¿rũ texé tá choxũ tataãëxëẽ? ¿Rũ ñuxãcü tá choxũ petaãëxëẽ, ega pexũ changechaũxëẽgu? <sup>3</sup> Rũ yemacèx nixĩ ga yemaãcü pexcèx popera chaxümatüxũ na penamexëẽgüxücèx i perü guxchaxũgü naxũpa na pexütawa chaxũxũ. Yerü tama chanaxwèxe ga yexguma chi yéma chaxũxgu na choxũ pengechaũxëẽxũ. Erü pema nixĩ i chanaxwèxexũ na choxũ petaãëxëẽgüxũ. Rũ aixcüma nagu charüxĩnũ rü ngëxguma choma chataãëxgu rü pema rü tá ta petaãëgü. <sup>4</sup> Rũ yexguma pexcèx chanaxümatügu ga yema popera, rü poraãcü chanaxixãchiãẽ, rü düxwa yema chorü ngechaũmaã chaxaxu. Natürü tama pexcèx chanaxümatü na pexũ changechaũxëẽxücèx, natürü pexcèx chanaxümatü na nüxũ pecuáxücèx na ñuxãcü poraãcü pexũ changechaũxũ.

*Pauru rü nüxũ nüxũ nangechaũ ga yema duũxũ ga chixexũ namaã üxũ*

<sup>5</sup> Rũ yema yatü ga choxũ ngechaũxëẽxũ, rü tama choxũxĩcatama nixĩ ga nangechaũxëẽxũ, natürü pexũ rü ta nangechaũxëẽ. Natürü tama chanangupetüxëẽchaxũ na pexna chacaxũ i ngemachiga.. <sup>6</sup> Rũ yema poxcu ga nüxna pexãxũ ga yema duũxũ ga yexguma pengutaquëxegügu, rü chauxcèx rü marü name na ngëxĩcatama na yĩxũ. <sup>7</sup> Rũ ngëmacèx i ñuxma rü chanaxwèxe i nüxũ nüxũ pengechaũ i norü chixexũ rü nüxũ perüngüxëẽ na tama yexeraxũ i chixexũwa nagaãxücèx i ngëma norü ngechaũ. <sup>8</sup> Rũ ngëmacèx chanaxwèxe i wenaxãrũ noxrirüũ nüxũ nüxũ pedauxëẽ na aixcüma nüxũ pengechaũxũ. <sup>9</sup> Rũ yemacèx nixĩ ga yemachiga marü pexcèx chanaxümatüxũ, yerü pexũ

chaxüchaũ, rü nüxũ chacuáxchaũ ngoxi marü aixcüma chauga pexĩnüẽ. <sup>10</sup> Rü ñuxma pemaã nüxũ chixu rü yixema pema tüxũ nüxũ pengechaũxẽ i tümaãrü chixexũ, rü choma rü tá ta tüxũ nüxũ changechaũ. Rü ngëxguma chi tacü rü chixexũxũ tüxũ changechaũgu, rü pegagu nixĩ i Cristupéxewa tüxũ nüxũ changechaũxũ i ngëma. <sup>11</sup> Rü ngëmaãcü chanaxü na tama nayoxniëxũcèx i Chataná na chixexũgu tüxũ nayixëëxũcèx. Erü yixema rü meãma nüxũ tacuèx i nacüma i Chataná na ñuxãcü chixexũgu tüxũ nayixëëchaũxũ.

*Tróaarü ñãnewa rü nanaxixãchiãẽ ga Pauru*

<sup>12</sup> Rü yexguma Tróaarü ñãnewa changuxgu na nüxũ chixuxũcèx ga Cristuarü ore, rü poraãcü choxũ natauxcha na yéma tórü Coriaxũ chapuracüxũ. <sup>13</sup> Natürü tama aixcüma chataãẽ ga yéma, yerü tama yexma nüxũ chayangau ga taeneẽ ga Titu. Rü yemacèx nüxũ charümoxẽ ga yémacũãx ga duũxũgü, rü ichaxũãchi, rü Machedóniããnewa chaxũ.

*Cristu rü Paurumaã napora*

<sup>14</sup> Rü Tupanana moxẽ taxãgü erü norü duũxũgüxũ toxũ nixĩgüxẽ. Rü ñuxma na Cristuarü duũxũgü tixĩgüxũ, rü nüma ya Tupana rü guxũguma tomaã nanaxüpéxe. Rü nüma nixĩ i toxũ namuxũ na duũxũgüxũ nüxũ tacuèxëëxũcèx i norü ore. Rü ngëma norü ore rü guxũwama nangu rü guxũguma nipuema ñoma wüxi i pumara i yixichixũrüũ. <sup>15</sup> Rü ñuxma i toma i Cristugagu Tupanapéxewa na timexũ, rü guxũwama tanguchigagü natanüwa i ngema yaxõgüxũ rü ngema tama yaxõgüxũ..

<sup>16</sup> Rũ ngẽma duũxũgũ i tama yaxõgũxũ rũ nüxũ nawèx-tũmũxũ i tochiga, erũ ngema ore i nüxũ tixuxũ rũ norũ poxcuchigaxũ namaã nixu. Natürũ ngẽma yaxõgũxũ rũ namaã nataxẽgũ i tochiga erũ ngema ore i nüxũ tixuxũ rũ ore i namaxẽxẽxũ nixĩ. Rũ ngẽmacèx ȷtexéãxũ natauxcha i ñãã puracũ na nüxũ tixuxũ i ngẽma ore? <sup>17</sup> Rũ yĩxema toxrũũ ixĩgũxexicatama tixĩ ya tũxũ natauxchaxe. Rũ toma rũ tama Tupanaãrũ oregu dĩeru ngĩxũ tayaxu ngẽma togũ naxũgũxũrũũ. Natürũ Tupanapéxewa rũ aixcũma meã nüxũ tixu i ngẽma norũ ore, erũ nũma toxũ nimugũ rũ Cristuarũ tixĩgũ.

### 3

#### *Tupanaãrũ uneta i ngexwacaxũxũchiga*

<sup>1</sup> Rũ ñũxma na pemaã nüxũ tixuxũ na aixcũma Tupana yĩxũ ga toxũ mucũ, rũ bexmana tá nagu perũxĩnũẽ na wè-naxãrũ togüétũwa tidexagũxũ. ȷÉxna penaxwèxe na wũxi i carta i cuèxruũ pexũ tawéxũ na nawa nüxũ pecuáxũcèx na aixcũma Tupanaãrũ orearũ uruũgũ tixĩgũxũ, rũ éxna penaxwèxe na pexũtawa naxcèx itaçaxũ i cartagũ na ngẽmawa duũxũgũ toxũ cuáxũcèx naxrũxũ i ngema togũ?  
<sup>2</sup> Rũ pemaã nüxũ tixu rũ tama tanaxwèxe i tacũ rũ carta na duũxũgũ toxũ cuáxũcèx, erũ pematama nixĩ i ngẽma cartarũũ pixĩgũxũ, rũ pewa nixĩ i nangóxũ na aixcũma Tupana yĩxũ ga toxũ mucũ. Rũ meãma toõẽwa nüxũ tacuèx i ngẽma. Rũ yema na naxũchicũũxũ ga perũ maxũ, rũ ngẽmawa guxũma i duũxũgũ nüxũ nadau na aixcũma wũxi ga mexũ ga puracũ taxũxũ ga petanũwa.  
<sup>3</sup> Rũ ñũxma rũ meãma nangox na pema rũ ñoma wũxi i carta i Cristutama ũmatũxũrũũ na pixĩgũxũ. Rũ torũ

puracügagu nixĩ i ngẽma. Natürü tama wüxi i carta i țacü rü ümatüxũmaã ümatüxũ pixĩgü, natürü pema nixĩ i carta i Tupana ya Maxücüãe i Üünexü ümatüxũ. Rü ngẽma carta rü tama popera rü éxna nutawa iwücuchixũ nixĩ, natürü perü maxüwa nixĩ i nangóxü i ngẽma. <sup>4</sup> Rü ngẽmacèx tama tamuũe na ngẽmaãcü togücèxtama tidex-agüxũ, erü tayaxögü na Cristugagu Tupana toxũ dauxũ na timexũ. <sup>5</sup> Rü tama toxrütama çuèxmaã nixĩ i tanaxüxũ i țacü rü mexũ. Natürü guxüma i ngẽma taxüxũ rü Tupanaärü ngüxẽemaã nixĩ i tanaxüxũ. <sup>6</sup> Rü Tupana rü toxũ narüngüxẽe na duüxügümaã nüxũ tixuxũ i ngẽma ngexwacaxüxũ i norü uneta na ñuxãcü Cristugagu tá tüxna naxãxũ i maxũ i taguma gúxũ. Rü ngẽma maxũ rü tama yema mugü ga Moïché ümatüxügagu tanayaxu, natürü tanayaxu erü Tupanaãe i Üünexü tüxna nanaxã. Rü yema mugü ga Moïché ümatüxũ rü yuwa tüxũ nagagü, natürü Tupanaãe i Üünexü rü tüxna nanaxã i maxũ i taguma gúxũ. <sup>7</sup> Rü yema mugü ga Moïchéna naxãxũ ga Tupana, rü nutagu nixĩ ga naxümatüxũ. Rü yexguma Moïché nayauxgu ga yema mugü, rü poraãcü niyaurachiwecüxü. Rü yemacèx ga duüxügü rü taxucürüwama Moïchéchiwegu narüdaunü. Natürü yema norü yaurachiwecüü rü nioxchigü. Natürü ga yema mugü ga Moïché tüxna äxũ i yuwa tüxũ gagüxũ, rü taxũ ga yauracüüxũmaã ínangu. Rü yemaãcü namexëchi ga yexguma ínanguxgu. <sup>8</sup> Natürü yexeraãcü namexëchi nixĩ i ngẽma uneta i ngexwacaxüxũ i Tupanaãe i Üünexü taxcèx ngoxëxũ. <sup>9</sup> Rü yemaãcü woo namexëchi ga yema mugü ga yuwa tüxũ gagüxũ, natürü yexeraãcü namexëchi i ngẽma uneta i ngexwacaxüxũ i Tupanapéxewa tüxũ mexëxũ. <sup>10</sup> Rü yema mugü ga noxri mexëchixũ, rü ñuxma rü taxuwama



name, ega namaã nügü nangugügu i ngêma Tupanaãrû uneta i ngexwacaxũxũ i yexeraãcü mexêchixũ. <sup>11</sup> Rû yemaãcü woo namexêchi ga yema mugü ga paxaãchi ixĩxũ, natürü yexeraãcü namexêchi i ngêma uneta i ngexwacaxũxũ i guxũgutáma ixĩxũ. <sup>12</sup> Rû toma aixcüma nüxũ tacuèx na guxũgutáma yĩxũ i ngêma Tupanaãrû uneta i ngexwacaxũxũ i mexêchixũ, rû ngêmacèx tama cúãcüma duũxũgümaã nüxũ tixu. <sup>13</sup> Rû ngêmacèx tama duũxũgüchaxwa iticuxgü yema Moĩché üxürüü. Yerü ga Moĩché rû nügü nidüxchiwe na tama nüxũ nadaugüxücèx ga yema Yudfugü ga ñuxãcü na yaxochigüxũ ga norü yaurachiwecüü. <sup>14</sup> Natürü ga yema duũxũgü ga Moĩchéxũ íxümücügüxũ rû ñoma yadüxgüchiwexürüü nixĩgü yerü tama nüxũ nacuèxgüéga ga țacüchiga na yĩxũ ga yema mugü. Rû ñuxma rû ta i ngêma Yudfugü rû tama nüxũ nacuèxgüéga i ngêxguma nawa nangúegu i ngêma mugü. Erü nangêxma i țacü i ñoma yadüxgüchiwexürüü nüxũ naguxchaxêèxũ na tama nüxũ nacuèxgüxücèx. Rû ñuxma rû ta tama nüxna ínanguéga i ngêma nacüma erü Cristuxicatama nixĩ ya yima nüxna ínanguxêècü. <sup>15</sup> Rû ñuxma rû ta i ngêma Yudfugü, rû ngêxguma nawa nangúegu i ngêma ore ga Moĩché tuxna äxũ, rû nangêxma i țacü i ñoma yadüxgüchiwexürüü nüxũ naguxchaxêèxũ na tama nüxũ nacuèxgüégaxücèx na țacüchiga yĩxũ i ngêma ore. <sup>16</sup> Natürü ngêxguma wüxi i duũxũ nüxũ rüxoxgu i nacüma i chixexũ, rû tórü Coriaxũ yaxõõgu, rû ngêxguma nixĩ i nüxna ínanguxũ i ngêma nüxũ naguxchaxêèxũ. <sup>17</sup> Erü nüma ya tórü Cori rû Naã i Üünexũ rû wüxitama nixĩ rû ngextá ínangêxmaxüwa i tórü Coriãe i Üünexũ, rû tuxũ nanatauxchaxêe na Tupanana ingaica-

magüxũ. <sup>18</sup> Rũ ngẽmacèx guxãma i yixema na Cristuaxũ yaxõgüxũ rũ ñoma wüxi i woruarüũ tawa nangóchipeta na ñuxãcü namexẽchixũ ya tórü Cori erü nataxuma i ƭacü i tüxũ idüxüxũ naxchaxwa. Rũ nüma ya tórü Cori i Naãe i Üünexũ ixĩcü, rũ guxũguma yexeraãcü tüxũ nimexẽechigü na naxrüũ aixcüma imexüçèx.

#### 4

<sup>1</sup> Rũ ngẽmacèx taguma nüxũ tarüchau i ñãã puracü, erü Tupana ya nüxũ tangechaütümüücü nixĩ ga toxũ mucü na tanaxüxüçèx i ñãã puracü na duũxũgümaã nüxũ tixuxüçèx i norü ore. <sup>2</sup> Rũ yemacèx nüxũ tarüxoe ga guxũma ga ƭacü ga chixexũ i ãne tüxna ãxũ i cúacü üxũ. Rũ tama tanawomüxẽẽacüma nixĩ i namaã nüxũ tixuxũ i ore rũ tama tanaxüchicüü i ngẽma ore. Natürü ngẽma ore i aixcüma ixĩxüxĩcatama nixĩ i nüxũ tixuxũ. Rũ ngẽmaãcü Tupanapéxewa tamaxẽ rũ duũxũgüpéxewa togü itawéx na nüxũ nacüèxgüxüçèx na ñuxãcü tixĩgüxũ i tomax. <sup>3</sup> Rũ ngẽxguma chi texécèx naguxchagu i ngẽma ore i mexũ i nüxũ tixuxũ, rũ ngẽma duũxũgü i iyarütaxexüçèxicatama nixĩ i naguxchaxũ. <sup>4</sup> Erü nümagü rũ tama nayaxõgü. Rũ ngẽmacèx i ñoma i naãneãrü ãëxgacü i Chataná rũ nüxũ nanaguxchaxẽẽ na tama nüxũ nacüèxgüxüçèx na ñuxãcü namexẽchixũ i norü ore ya Cristu ya Üünecü. Rũ Cristuwa nixĩ i nangóxũ na ñuxãcü na yĩxũ ya Tupana. <sup>5</sup> Rũ ngẽxguma duũxũgümaã nüxũ tixuxgu i ngẽma ore, rũ tama tochigaxütama tixugü. Natürü nüxũ tixu na Ngechuchu ya Cristu rũ tórü Cori yĩxũ, rũ nüma tüxũ na nangechaüxũgagu perü ngüxẽẽruũgü na tixĩgüxũ. <sup>6</sup> Erü nümatama ya

Tupana ga noxri naãne naxüxgux rü ãñexüwa nangoxëécü ga ngóonexü, rü nümatama nixĩ i ñuxma i tüxü yangoxnaãëxëgüxü na ngëmawa nüxü icuáxücèx na ñuxãcü namexëchixü i nümax. Rü ngëma norü mexü rü Ngechuchu ya Cristuchiwewa nixĩ i nüxü idauxü.

*Tayaxôgüama ega woo ngúxü ingegügu*

<sup>7</sup> Rü ngëma nüxü na icuáxü na ñuxãcü namexëchixü ya Tupana, rü ngëma cuèx rü wüxi i mexëchixü nixĩ. Natürü ngëma cuèx i mexëchixü rü taxüne i maïraxünaxcèxwa nangëxma, na nangóxücèx na Tupanawa ne naxüxü i guxüma i pora rü tama i tawatama. <sup>8</sup> Rü guxüwama toxü nangëxma i guxchaxügü, natürü taguma nüxü tarüchau i ñaã puracü. Rü woo poraãcü taxoegaãëgügu, natürü taguma ítanangéx. <sup>9</sup> Rü woo togü towe ingëxütanügu, natürü ya Tupana rü taguma toxü ínawogü. Rü woo duüxügü toxü napíexëëgu, natürü tama ngëxma tayacuèxëë i ñaã puracü. <sup>10</sup> Rü guxüwama i ngextá ítaxixüwa rü äücümaxüwa tangëxmagü, yexgumarüü ga Ngechuchu na äücümaxüwa nayexmaxürüü. Natürü ngëmaãcü toxü naxüpetü na duüxügü nüxü daugüxücèx na ñuxãcü towa namaxüxü ya Ngechuchu. <sup>11</sup> Rü ñuxma na tamaxëxü, rü guxü i ngunexügu rü Ngechuchugagu äücümaxüwa tangëxmagü. Natürü ngëmaãcü toxü naxüpetü na Ngechuchu inawéxücèx i norü pora nawa i ñaã toxone i yuxwèxexü. <sup>12</sup> Rü ngëmaãcü Tupanaärü oreçèx äücümaxüwa tangëxmagü, natürü ngëmaãcü toxü naxüpetü na pema rü pexü nangëxmaxücèx i maxü i taguma gúxü. <sup>13</sup> Tupanaärü ore i ümatüxüwa rü ñanagürü:

“Nüxü chayaxô rü yemacèx Tupanachiga chidexa”,

ñanagürü. Rū ngëxgumarüütama tixĩgü i toma na tayaxögüxũ rü Tupanachiga tidexagüxũ. <sup>14</sup> Erü nüxũ tacuèxgü rü Tupana ga yuwa ínadxēēcü ga Ngechuchu ya tórü Cori, rü yimatama Tupana tá nixĩ ya toxũ írüdagüxēēcü, erü Ngechuchuarü duũxũgü tixĩgü. Rū ngēmaācü wüxigu pemaã nügüxũtawa tá toxũ nagagü. <sup>15</sup> Rū guxũma ga yema toxũ ngupetüxũ rü perü mexũcèx nixĩ na yexeraācü yamuētanüxũcèx i ngēma duũxũgü i Tupana nüxũ rüngüxēēgüxũ. Rū ngēmaācü tá düxwa namuxũchi i ngēma duũxũgü i moxē Tupanana āgüxũ rü nüxũ icuèxüũgüxũ. <sup>16</sup> Rū ngēmacèx taguma nüxũ tarüxoe na nüxũ tixuxũ i ngēma ore. Rū woo yayachigügu rü yaturachigügu i toxone, natürü toōēwa rü guxũ i ngunexũgu rü yexeraācü tiporaetanü. <sup>17</sup> Erü ngēma ngüxũ i toxũ üpetüxũ i ñaã torü maxũwa, rü ngēma rü wüxi i paxaāchimare nixĩ rü paxa tá nangupetü. Natürü ngēmaācü tá tanayaxu i wüxi i maxũ i mexēchixũ i tagutáma gúxũ i ñoma i naānecũāx i maxũārü yexeraxüchi ixĩxũ. <sup>18</sup> Rū tama ngēma ñuxma nüxũ idauxũgu nixĩ itarüxĩnüēxũ, natürü nagu tarüxĩnüē i ngēma ñuxma tama nüxũ idauxũ. Erü ngēma ñuxma nüxũ idauxũ rü tama natai, natürü ngēma ñuxma tama nüxũ idauxũ, rü guxũgutáma nangēxmaēcha.

## 5

<sup>1</sup> Rū nüxũ tacuèxgü ega ngëxguma iyanaxoxgu i ñaã toxone i paxaāchi ñuxma toxũ ngëxmaxũ, rü daxügüxũ i naānewa tá tanayaxu i wüxi i toxone i tagutáma iyarüxoxũ i Tupanatama toxcèx mexēēxũ rü tama i duũxũgü. <sup>2</sup> Rū ngēmacèx i ñuxma i ñaã toxonewa tamaxēyane, rü tama aixcúma tataāēgü. Erü tanaxwèxe na paxa

toxŭ́ nangẽxmaxŭ́ i ngẽma toxone i daxŭguxŭ́ i naãnewa ngẽxmaxŭ́. <sup>3</sup> Rŭ ngẽma toxone i daxŭguxŭ́ i naãnewa tá toxŭ́ ngẽxmaxŭ́ rŭ ñoma wŭxi i naxchirurŭ́ tá toxŭ́ nidŭxŭ́, na ngẽmaãcŭ́ naxãxŭnexŭcèx i toõẽ. <sup>4</sup> Rŭ ñãã toxone i ñŭxma toxŭ́ ngẽxmaxŭ́wa tamaxẽyane, rŭ tanaxixãchiãẽgŭ́ rŭ tama aixcŭma tataãẽgŭ́. Rŭ tama aixcŭma ítanatáxchaŭ́ i toxone i ñoma i naãnewa toxŭ́ ngẽxmaxŭ́, natŭrŭ tanaxwèxegŭ́ na tanayaxuxŭ́ i toxone i ngexwacaxŭxŭ́ na ngẽmaãcŭ́ ngẽma maxŭ́ i ngexwacaxŭxŭ́ iyanaxoxẽẽxŭcèx i toxone i ñŭxma toxŭ́ ngẽxmaxŭ́. <sup>5</sup> Rŭ Tupana nixĩ ya toxŭ́ imexẽẽcŭ́ naxcèx i ngẽma ngexwacaxŭxŭ́ i maxŭ́ rŭ ngẽma ngexwacaxŭxŭ́ i toxone. Rŭ toxna nanamu ga Naãẽ i Ŭŭnexŭ́ na ngẽmawa nŭxŭ́ tacuáxŭcèx na aixcŭma tá tanayaxuxŭ́ i ngẽma. <sup>6</sup> Rŭ ngẽmacèx taxucèxma taxoegaãẽgŭ́. Erŭ nŭxŭ́ tacuèx rŭ ñŭxma ñãã toxonewa tamaxẽyane, rŭ taxucŭrŭwama tórŭ Corixŭtawata tangẽxmagŭ́ i daxŭguxŭ́ i naãnewa. <sup>7</sup> Rŭ woo tama nŭxŭ́ tadaugŭgu ya yima tórŭ Cori i ñŭxmax, natŭrŭ tayaxõgŭ́ na wŭxi i ngunexŭ́ rŭ tá nŭxŭ́ tadaugŭxŭ́. Rŭ ngẽma nixĩ i toxŭ́ poraxẽẽxŭ́ i ñãã torŭ maxŭ́wa. <sup>8</sup> Rŭ ngẽmacèx taxucèxma taxoegaãẽgŭ́ ega tayuegu. Erŭ toxcèx rŭ narŭmemaẽ nixĩ na nŭxna ítachoxŭxŭ́ i ñãã toxone, na tórŭ Corixŭtawata tayangẽxmagŭxŭcèx. <sup>9</sup> Rŭ ngẽmacèx, woo ñoma i toxonewa tangẽxmagŭgu rŭ éxna tama nawa tangẽxmagŭgu, rŭ tanaxwèxe na guxŭguma tórŭ Coriarŭ ngŭ́chaŭ́ na taxŭxŭ́. Rŭ ngẽmacèx naxcèx tadaugŭ́ na tanaxŭxŭ́ i ngẽma nanaxwèxexŭ́ i nŭmax. <sup>10</sup> Erŭ guxãtama i yixema rŭ Cristupéxewa tá tangugŭ́ na wŭxichigŭ́ nayaxuxŭcèx i ngẽma tŭxna ŭxŭ́. Rŭ nŭma tá wŭxichigŭxŭ́ nangugŭarŭ maxŭ́ãx. Rŭ ngẽxgumarŭ́ na

ñuxácü meã imaxêxũ rü éxna chixri imaxêxũ ga yexguma ñoma ga taxünewa iyexmagügu, rü ngẽmaácü tá tuxna nanaxã ya wüxichigü.

*Cristu rü taxcèx Tupanaxũ narüngüxmüxêẽ*

<sup>11</sup> Rü ngẽmacèx Tupanaãrü orearü uwa tapuracüe rü tayaxucuxêgü i duïxügü na yaxögüãxücèx. Erü toma rü aixcüma torü Corixũ tamuũẽ. Rü Tupana toxũ nacuèx na ñuxácü yïixũ i tórü maxũ, rü chierüna pema rü chi ta toxũ pecuèxgux. <sup>12</sup> Rü tama tanaxwèxe i wenaxãrü togüétüwa tidexagü, natürü pexũ tarüngüxêẽchaũ na pexũ nangëxmaxücèx na tacücèx tomaã petaãëgüxũ na nüxũ pecuáxücèx na ñuxácü penangãxũxũ i ngẽma duïxügü i pepéxewa nügü írümegünetaxũ natürü norü maxüwa rü tama ixaixcümagüxũ. <sup>13</sup> Rü woo duïxügü toxũ daugügu na Tupanagu taxããëgüxũ, rü nüetama nixĩ i ngẽma erü nümatama ya Tupana rü meãma toxũ nacuèx. Natürü i pema rü meãma toxũ pecuèx na meãma toõèxũ tacuáácüma pemaã nüxũ tixuxũ ga norü ore. <sup>14</sup> Rü Cristu ya poraácü toxũ ngechaücü nixĩ ya ñuxma tomaã icuácü, erü tayaxõ na nüma rü guxããrü pecaducèx nayuxũ na yexma yanaxoxücèx ga guxããrü chixexügü. <sup>15</sup> Rü yemaácü guxüma ga duïxügücèx nayu ga Cristu, na ngẽma duïxügü i ñuxma maxêxũ, rü tama nümatama nagu naxĩnüèxügu namaxêxücèx, natürü naxcèx na namaxêxücèx ya yima naxcèx yucü rü wena írüdacü. <sup>16</sup> Rü ngẽmacèx i toma rü tama ñoma i naãnecũãx i duïxügü nagu rüxĩnüèxürüũ texéxũ tangugüarü maxũãx. Rü woo ga üpa rü ñoma ga naãnecũãx ga duïxügü nagu rüxĩnüèxürüũ Cristuxũ tangugü, natürü i ñuxma rü tama ngẽmaácü namaã nagu tarüxĩnüè. <sup>17</sup> Rü

ngëxguma texé Cristuaxŭ́ yaxõxgu, rü ngexwacaxŭ́xŭ́ i duŭ́xŭ́ tixĩ. Rü nuxcŭ́maŭ́xŭ́ ga tŭ́macŭ́ma rü marŭ́ tŭ́xna inayarŭ́xo, rü ngexwacaxŭ́xŭ́ i maxŭ́ tŭ́xŭ́ nangëxma. <sup>18</sup> Rü guxŭ́ma i ngëma rü Tupana nixĩ ya naxŭ́cŭ́. Rü nŭ́ma nixĩ ga Cristugagu tamaã inangŭ́xmŭ́xŭ́. Rü ñuxma rü toxŭ́ namu na duŭ́xŭ́gŭ́maã nŭ́xŭ́ tixuxŭ́ na namaã inangŭ́xmŭ́ëxŭ́cèx. <sup>19</sup> Yerü Tupana rü Cristugagu duŭ́xŭ́gŭ́maã nŭ́gŭ́ narŭ́ngŭ́xmŭ́ëë. Rü tama duŭ́xŭ́gŭ́arŭ́ pecadugu naxĩnŭ́ãcŭ́ma nanaxŭ́ ga yema. Rü ñuxma rü toxŭ́ namu na ngëmachigaxŭ́ duŭ́xŭ́gŭ́maã tixuxŭ́. <sup>20</sup> Rü ngëmaãcŭ́ Cristuarŭ́ orearŭ́ ngeruŭ́gŭ́ tixĩgŭ́, rü towa nixĩ i Tupana pexŭ́ cèxŭ́xŭ́ na namaã iperŭ́ngŭ́xmŭ́ëxŭ́cèx. Rü ngëmacèx Cristuégagu pexŭ́ tacèxŭ́gŭ́ na Tupanamaã iperŭ́ngŭ́xmŭ́ëxŭ́cèx. <sup>21</sup> Cristu rü taguma pecadu naxŭ́. Natŭ́rŭ́ tagagu nixĩ ga Tupana ga ñoma pecaduáxŭ́rŭ́ŭ́ãcŭ́ma namaã naxŭ́ãxŭ́ na yemaãcŭ́ nagagu tŭ́xŭ́ ínanguxŭ́ëëxŭ́cèx nawa i tórŭ́ chixexŭ́ na aixcŭ́ma napéxewa imexŭ́cèx.

## 6

<sup>1</sup> Rü ñuxma na Tupanaãrŭ́ ngŭ́xëëruŭ́ tixĩgŭ́xŭ́, rü pexŭ́ tacèxŭ́ na tama nŭ́xŭ́ pexoexŭ́cèx ga yema pemaã na namecŭ́maxŭ́ ga yexguma nayuxgu ga Nane. <sup>2</sup> Erŭ́ Tupana rü norŭ́ ore i ŭ́matŭ́xŭ́wa, rü ñanagŭ́rŭ́:

“Rü yema ngunexŭ́ ga nagu namexŭ́gu na choxŭ́ peyaxuxŭ́, rü yexguma nixĩ ga pexŭ́ chaxĩnŭ́xŭ́. Rü yexguma pexna chanaxuãxŭ́gu ga maxŭ́ i taguma gúxŭ́, rü yexguma nixĩ ga pexŭ́ charŭ́ngŭ́xŭ́ëëxŭ́”, ñanagŭ́rŭ́. Rü ñuxma nixĩ i ngëma ngunexŭ́ i nagu namexŭ́ na Tupanaxŭ́ peyaxuxŭ́, rü ñuxma nixĩ i ngëma ngunexŭ́ i pexna naxuaxŭ́ãxŭ́ i maxŭ́ i taguma gúxŭ́.

<sup>3</sup> Rŭ toma rŭ guxŭguma naxcèx tadau na guxăpéxewa meă tamaxèxŭ na taxucèxma texé chixri torŭ puracŭchiga idexaxŭcèx. <sup>4-5</sup> Rŭ guxŭwama duŭxŭgŭxŭ nŭxŭ tadauxèèchaŭ na aixcŭma Tupanaărŭ duŭxŭgŭ tixŭgŭxŭ. Rŭ ngēmacèx yaxna namaă taxŭnŭē i ngēxguma woo ngŭxŭ toxŭ ngupetŭgu, rŭ éxna țacŭ toxŭ tauxgu, rŭ éxna țacŭ rŭ guxchaxŭ toxŭ ngēxmagu, rŭ éxna toxŭ yaçuaixgŭgu, rŭ éxna toxŭ napoxcuegu, rŭ éxna naxixăchiăētanŭgu rŭ tomaă nanuēgu. Rŭ poraăcŭxŭchima tapuracŭe, rŭ ņuxguacŭ rŭ tama tapee, rŭ ņuxguacŭ rŭ taiya toxŭ nangux. Natŭrŭ yaxna namaă taxŭnŭē i guxŭma i ngēma. <sup>6</sup> Rŭ ngexgumarŭxŭ ta duŭxŭgŭxŭ nŭxŭ tadauxèē na aixcŭma namexŭ i torŭ maxŭ, erŭ aixcŭma Tupanapéxewa meă tamaxē, rŭ meă Tupanaxŭ tacuèx, rŭ yaxna duŭxŭgŭmaă taxŭnŭē, rŭ namaă tamecŭma. Rŭ nŭxŭ nŭxŭ tadauxèē na towa nangēxmaxŭ i Tupanaăē i Ūŭnexŭ rŭ aixcŭma guxŭ i duŭxŭgŭxŭ tangechaŭxŭ. <sup>7</sup> Rŭ duŭxŭgŭxŭ nŭxŭ tadauxèē na aixcŭma namexŭ i torŭ maxŭ, erŭ namaă nŭxŭ tixu i ngēma ore i aixcŭma ixŭxŭ, rŭ itanawéx i Tupanaărŭ pora i towa ngēxmaxŭ. Rŭ ngēma toxne ixŭxŭ rŭ ngēma nixŭ i torŭ maxŭ i aixcŭma mexŭ i Tupanapéxewa. Rŭ ngēmamaă nixŭ i togŭ itapoxŭxŭ i torŭ uwanŭgŭpéxewa. <sup>8</sup> Rŭ ņuxguacŭ i duŭxŭgŭ rŭ toxŭ nicuèxŭgŭ, rŭ ņuxguacŭ rŭ țacŭ tomaă nixugŭe. Rŭ ņuxguacŭ rŭ meă tochiga nidexagŭ, rŭ ņuxguacŭ rŭ chixri tochiga nidexagŭ. Rŭ woo aixcŭmachiréx yixŭgu i ngēma ore i nŭxŭ tixuxŭ, natŭrŭ doratèèx toxŭ nawogŭe. <sup>9</sup> Rŭ woo meă toxŭ nacuèxgŭchiréxgu, natŭrŭ ņoma tama toxŭ nacuăxŭrŭŭ tomaă nixŭgŭ i duŭxŭgŭ. Rŭ ņuxguacŭ



rü wixgutaèx tayue, natürü naetüwa tamaxëãma. Rü toxũ napoxcue, natürü tama toxũ nadaixichi. <sup>10</sup> Rü woo tangechaũgũgu, natürü guxũguma tataãëgüama. Rü woo ñoma i naãnewa tama tamuãrũ ngẽmaxũãxgũgu, natürü muxũma i duũxũna tanaxã i taxũ i mexũ erü togagu nanayaxu i maxũ i taguma gúxũ. Rü woo tax-uũma toxũ ngẽxmèxgu i ñoma i naãnewa, natürü daxũ-guxũ i naãnewa rü toxũ nangẽxma i guxũma. <sup>11</sup> Pa Chaueneëgũ i CorítiucũĀx, dũcax aixcũma pemaã nüxũ tixu rü guxũ i torü maxũnemaã pexũ tangechaũgũxũchi. <sup>12</sup> Rü toma rü tama pexũ taxoe, natürü pema waxi nixĩ i tama petoxwèxexũ. <sup>13</sup> Rü dũcax, Pa Chaueneëgũx, rü ñoma wüxi i papá naxãcũgũxũ cèèxũxũrũũ pexũ chacèèxũ na choxũ pengechaũgũxũcèx ngẽma choma pexũ changechaũxũrũũ.

### *Tupana ya maxũcũpata tixĩgũ*

<sup>14</sup> ¿Rü tãütãma namaã pexãmücü i ngẽma duũxũgũ i tama yaxõgũxũ! Erü ngẽxguma chi ngẽmaãcü penaxũxgu rü tãütãma guxã wüxigu perũxĩnüë. ¿Rü ñuxãcü nawũx-iguxũ i ngẽma mexũ namaã i ngẽma chixexũ? ¿Rü ñuxãcü nawũxigu i ngóonexũ namaã i ëãnexũ? <sup>15</sup> ¿Rü ñuxãcü nawũxiguxũ ya Cristu namaã i Chataná? ¿Rü ñuxãcü nawũxiguxũ i wüxi i duũxũ i yaxõxũ namaã i wüxi i duũxũ i tama yaxõxũ? <sup>16</sup> ¿Rü ñuxãcü Tupanapatawa nangẽxmaxũ i tupananetachicünèxãgũ? Erü yixema rü Tupana ya maxũcũpata tixĩgũ, rü tawa namaxũ i nümax. Rü Tupana rü pechiga nidexa ga yexguma ñaxgu:

“Rü ngẽma duũxũgũwa tá chamaxũ, rü natanügu tá chayarũxũxũ. Rü norü Tupana tá chixĩ, rü nümagũ rü tá chorü duũxũgũ nixĩgũ”,

ñaxgu. <sup>17</sup> Rü yemacèx ñanagürü ta ga tórü Cori:

“¡Rü ípechoxũ i natanüwa i ngẽma duũxũgü i tama chorü duũxũgü ixĩgũxũ! ¡Rü tãxú i nüxũ pingõgũxũ i ngẽma chopéxewa chixexũ! Rü choma rü tá pexũ chayaxu. <sup>18</sup> Rü choma rü Penatü tá chixĩ, rü pemagü rü tá chaunegü rü chauxacügü pixĩgü”, ñanagürü ya tórü Cori ya Tupana ya guxũärü yexera poraxüchicü.

## 7

<sup>1</sup> Rü dücax, Pa Chaueneëgü ya Pexũ Changechaũgũxex, rü ngẽma Tupanaärü unetagü i pemaã nüxũ chixuxũ, rü taxcèx nixĩgü. Rü ngẽmacèx tanaxwèxe na yigüna idaugũxũ na tama taxünemaã rü éxna taãemaã naxüxcèx i ngẽma Tupanapéxewa tama mexũ. Rü tanaxwèxe i aixcüma Tupanaxũ imuũëãcüma nüxna yigü taxãgü rü naxcèxicatama tamaxẽ.

### *Pauru rü ngema Corítuucũăxgümaã nataãxẽ*

<sup>2</sup> Rü tanaxwèxe i toxũ pengechaũgü. Rü dücax ga toma rü taxúxemaãma chixexũ taxügü. Rü taxúxexũma chixexũgu tanguxẽẽ. Rü taxúxexũma tawomüxëëgü.

<sup>3</sup> Rü tama pexũ chixuxüxcèx nixĩ i pemaã nüxũ chixuxũ i ngẽma. Yerü marü pemaã nüxũ chixu na ñuxãcü guxũ ga chorü maxũmaã pexũ changechaũxũ. Rü ngema pexũ na changechaũxũgagu rü íchamemare na petanüwa chamaxũxũ rü éxna wüxigu pemaã chayuxũ.

<sup>4</sup> Rü ñuxma rü taxucèxma pexũ chaxãneãcüma pemaã chidexa erü poraãcü pemaã chataãẽ. Rü woo ngúxũ na tingegũxũ, natürü aixcüma choxũ penangúchaũxẽẽ rü choxũ petaãëxẽẽ. <sup>5</sup> Rü yexguma Machedóniãñewa

tangugügucürüwa rü taguma itarüngügü. Yerü guxüwama ga ngexta ítaxüwa rü nüxü itayangau ga guxchaxügü. Rü duüxügü rü toxü nanaguxchaxêê na tanaxüxü i Tupanaarü puracü rü yemacèx poraãcü taxoegaãxëgü.. <sup>6</sup> Natürü ya Tupana ya tüxü taãèxêêcü ya yíxema ngechaügüxe, rü toxü rü ta nataãèxêê ga yexguma toxütawa nanguxgu ga taeneê ga Titu. <sup>7</sup> Rü tama yema toxütawa na nanguxücèxicatama tataãëgü, natürü tataãëgü ta yerü ga pema rü poraãcü nüxü penangúchaüxêê rü penataãèxêê ga guma taeneê ga Titu. Rü nüma ga Titu rü tomaã nüxü nixu na ñuxácü poraãcü penaxwèxexü na toxü pedauxü. Rü tomaã nüxü nixu na ñuxácü naxcèx pengechaügüxü ga yema chomaã pexüxü, rü na ñuxácü chauxcèx pexoegaãëgüxü. Rü guxüma ga yema oremaã rü yexeraãcü chataãê. <sup>8</sup> Choma nüxü chacuèx rü yema popera ga pexcèx chaxümatüxü rü pexü nangechaügüxêê, natürü ñuxma rü marü tama naxcèx changechaü na chanaxümatüxü ga yema popera. Rü noxri rü yemaãcü naxcèx changechaü ga yexguma nüxü chacuèxgu ga na pexü nangechaügüxêêxü ga yema popera ga yexguma penayauxgu. <sup>9</sup> Natürü i ñuxma rü chataãê na pexcèx chanaxümatüxü ga yema popera. Rü tama yema na pengechaügüxücèx chataãê, natürü chataãê yerü yema perü ngechaügagu Tupanana pecuèxãchie rü penaxüchicüü ga perü maxü. Rü pema rü aixcüma Tupanana pecuèxãchieãcüma namaã peporae ga yema ngechaü, rü yemaãcü taxuüma ga chixexü pemaã taxü ga yexguma pexcèx tanaxümatügu ga yema popera. <sup>10</sup> Rü ngëma ngechaü i Tupana naxwèxexüãcüma namaã iporaexü, rü name nixĩ, erü ngëma ngechaügagu

naxüchicüü i tórü maxü rü ngẽmagagu tanayaxu i maxü i taguma gúxü. Rü ngẽmacèx taxucèxma naxcèx pixãüxãchie i ngẽma ngechaü. Natürü ngẽma ngechaü i ñoma i naãnecüãx i duüxügü nüxü ngẽxmaxü rü taxuwama name erü yuwa nanaga. <sup>11</sup> Rü yexguma yema poperamaã pexü changechaüxẽẽgu, rü Tupana naxwèxexüãcüma nixĩ ga namaã peporaexü ga yema ngechaü. ¡Rü dücax i ñüxma i țacü Tupana pemaã üxü i ngẽma perü ngechaügagu! Yerü yema perü ngechaügagu rü aixcüma nagu perüxĩnüẽ ga yema chixexü ga petanüwa üpetüxü, rü meãma chomaã nüxü pixu ga yema. Rü yema perü ngechaügagu rü peãewa nangux ga yema chixexü, rü poraãcü Tupanaxü pemuüẽ. Rü yemacèx penaxwèxe na yéma chaxüxü na pexü chayarüngüxẽẽxücèx yerü penamexẽẽgüchaü ga yema chixexü. Rü yema perü ngechaügagu rü aixcüma penaxucuxẽ ga yema duüxü ga chixexü üxü. Rü guxü ga yemawa rü ipenawéx na tama pegagu yĩxü ga yema chixexü ga ngupetüxü. <sup>12</sup> Rü yemacèx, yexguma pexcèx chanaxümatügu ga yema popera, rü tama yema duüxü ga chixexü üxügu charüxĩnüãcüma chanaxümatü, rü tama yema duüxü ga namaã chixexü naxüxügu charüxĩnüãcüma chanaxümatü. Natürü chanaxümatü ga yema popera na yemawa Tupanapéxewa nüxna pecuèxãchiexücèx na ñuxãcü aixcüma toxü pengechaügüxü. <sup>13</sup> Rü yema na toxü pengechaügüxü, rü wüxi ga taã nixĩ ga toxcèx. Natürü yema taããrü yexera nixĩ ga yema taã ga toxü yexmaxü ga yexguma nüxü tadèuxgu ga Titu ga ñuxãcü taxü ga taã petanüwa na nayaxuxü. Rü aixcüma guxãma ga pema nixĩ ga wenaxãrü poraãcü nüxü penangüchaüxẽẽxü.

<sup>14</sup> Rū noxri tauta yéma naxūxgu ga Titu, rū namaã nūxū chixu na mexū i duūxūgū na pixīgūxū. Rū ñuxma rū taxucèxma chaxāne, erū guxūma ga yema Titumaã nūxū chixuxū ga pechiga rū aixcūma ngēmaācū nixī, yexgumarūū na aixcūma yīxū ga guxūma ga yema Tupanaārū ore ga pemaã nūxū tixuxū. <sup>15</sup> Rū ñuxma i Titu rū yexeraācū pexū nangechaū i ngēxguma nūxna nacuèxāchigu na ñuxācū meā naga pexīnūēxū rū ñuxācū nūxū pengechaūācūma meā penayaxuxū. <sup>16</sup> Rū choma rū ta poraācū pemaã chataāēxūchi, erū nūxū chacuèx na aixcūma peyanguxēēxū ga guxūma ga yema pemaã nūxū chixuxū.

## 8

*Yema yaxōgūxū rū woo tama na namuārū dīeruāxgūxū, natūrū yema nūxū yexmacū ga dīerumaã meā togūxū narūngūxēēgū*

<sup>1</sup> Rū ñuxmax, Pa Chaueneēgūx, rū pemaã nūxū tixuxchaū na ñuxācū Tupana namaã mecūmaxū i ngēma yaxōgūxū i Machedóniāāneārū iānegūwa ngēxmagūxū. <sup>2</sup> Rū woo taxū ga guxchaxūgū nūxū na ūpetūgūxū, natūrū nataāēgūama. Rū woo tama na namuārū dīeruāxgūxū, natūrū yema nūxū yexmacū ga dīerumaã meā togūxū narūngūxēēgū. <sup>3</sup> Rū choma nūxū chadau rū pemaã nūxū chixu rū nūmagū rū taāēācūma ngīxū inaxāgū ga guxcūma ga dīeru ga nūxū tauxchacū na ngīxū inaxāgūxū. Rū ngīetū yemaārū yexera taāēācūma ngīxū inaxāgū. <sup>4</sup> Rū poraācū toxū nacuèxūgū na tama nūxna tanachuxuxūcèx na yemaācū yema togū ga taeneēgūxū nangūxēēgūxūcèx. <sup>5</sup> Rū yema nagu tarūxīnūēxūārū yexera ngīxū inaxāgū

ga yema yaxōgūxū ga Machedóniāānecūāx. Yerū Tupanaxīra nūgū naxāgū rū yemawena toxna nūgū nax-uaxūgū na toga naxīnūēxūcèx, yema Tupana naxwèx-exūrūū. <sup>6</sup> Rū yemacèx Tituxū tacèxū na wena petanūwa naxūxūcèx na ngīxū pinguxēēxūcèx ga yema dīeru ga marū pemaā ngīxū inaxūgūcū na ngīxū penutaquéxexū naxcèx i ngēma togū i taeneēgū i nūxū nataxuxū. <sup>7</sup> Pema rū guxūwama meā ipexī erū meā peyaxōgū, rū pexū natauxcha na meā nūxū pixuxū i Tupanaārū ore erū meā nūxū pecuèx na tacūchiga yīxū. Rū aixcūma togūxū perūngūxēēchaū, rū yema pexū tangūxēēxūācūma pegū pengechaūgū. Rū ñuxma rū ngēxgumarūū ta penaxwèxe na aixcūma meā ipexīxū nawa i ngēma mexū i nacūma na dīeru ngīxū ipexāxū naxcèx i ngēma taeneēgū i nūxū nataxuxū. <sup>8</sup> Tama wūxi i mu nixī i ngēma pemaā nūxū chixuxū. Natūrū chanaxwèxemare na nūxū pecuāxū na ñuxācū taāēācūma ngīxū inaxāgūxū ga togū ga yaxōgūxū. Rū pemaā nūxū chixu i ngēma na pema rū ta ngīxū ipexāgūxūcèx i ngēma dīeru i togū i taeneēgūarū ngūxēēcèx ixīcū, na ngēmaācū ipenawéxūcèx na aixcūma nūxū pengechaūgūxū. <sup>9</sup> Erū pema rū marū nūxū pecuèx na ñuxācū tamaā namecūmaxū ga tórū Cori ya Ngechuchu ya Cristu. Rū woo nūxū nayexma ga guxūma, natūrū ñoma wūxi ga ngearū yemaxūāxūrūū pexcèx nūgū nixīxēē na ngēmaācū pexū nangēxmaxūcèx i muxūma i mexūgū. <sup>10</sup> Rū ñuxma rū perū mexūcèx nixī i pemaā nūxū chixuxū i ngēma dīeruarū nutaquéxechiga. Rū tauncū ga ngupetūcūgutama nixī ga ipenaxūgūxū ga ngīxū na penutaquéxexū. Rū yema rū aixcūma perū

ngúchaũmaã nixĩ ga penaxũxũ. <sup>11</sup> Rũ ñuxma rũ yema noxri na meã ipenaxúgũxũrũũ, rũ name nixĩ i taãẽacũma rũ perũ ngúchaũmaã peyanguxẽẽ rũ ngẽma dĩaeru i pexũ ngẽxmacũwa ngĩxũ ipexã naxcèx i ngẽma peeneẽgũ i nũxũ nataxuxũ. <sup>12</sup> Erũ ngẽxguma aixcũma wũxi ya duũxẽ tũmaãrũ ngúchaũmaã ngẽma dĩaeru i tũxũ ngẽxmèxcũwa tũmaẽneècèx ngĩxũ itaxãxgu, rũ Tupana rũ taãẽacũma ngĩxũ nayaxu. Erũ nũma ya Tupana rũ taguma tũxna ngĩxcèx naca i ngẽma tũxũ tauxcũ. <sup>13</sup> Rũ ngẽmacèx tama chanaxwèxe i ngẽma togũxũ na perũngũxẽẽxũgagu pexũ nataxu i pemax. <sup>14</sup> Natürũ chanaxwèxe i guxãma tũxũ nangẽxma i ÷acũ i tanaxwèxexũ, erũ tama name na texéaxũ nataxuxũ i ÷acũ. Rũ ñuxma na pexũ nangẽxmaxũ i perũ dĩaeru, rũ name nixĩ i nũxũ perũngũxẽẽgũ i ngẽma taeneẽgũ i nũxũ nataxuxũ. Rũ ngürũãchi to i ngunexũgu i pema pexũ nataxugũ, rũ nũmagũ rũ tá nũxĩ nũxũ nangẽxma na pexũ nangũxẽẽgũxũcèx. Rũ ngẽmaãcũ tá guxãtama tawũxigu. <sup>15</sup> Rũ Tupanaãrũ ore i ùmatũxũwa rũ ñanagürũ:

“Guxema muxũma tũxũ yexmaxẽ rũ taxuũma tũxũ ínayaxũ. Rũ guxema noxretama tũxũ yexmaxẽ rũ tama tũxũ inayataxu”,  
ñanagürũ.

*Titu rũ namücügũchiga*

<sup>16</sup> Natürũ Tupanana moxẽ chaxã, erũ nũma rũ Tituxũ nagu narũxĩnũxẽẽ na aixcũma pexũ nangũxẽẽxũcèx, ngẽma choma pegu charũxĩnũxũrũũ. <sup>17</sup> Rũ nũma ga

Titu rü: “Ngũ” ñanagürü na wena petanüwa çanamuxũ. Yerü nüma rü woetama poracü pegu narüxĩnü. Rũ ngẽmacèx i ñuxma rü wena petanüwa naxũ, erü nüxũ nangúchaũ. <sup>18</sup> Rũ Titumaã ngema tanamu i wüxi i taeneẽ i guxũma i yaxõgüxũ nüxũ ngechaũgüxũ erü nüma rü aixcũma meã nüxũ nixu i Tupanaãrũ ore i tüxũ maxẽxẽxũ. <sup>19</sup> Rũ tama ngẽmacèxicatama nixĩ. Erü guxũma i ngẽma yaxõgüxũ rü ngẽma taeneẽxũ naxunetagü na toxũ íyaxümücüxũcèx rü toxũ nangũxẽxũcèx i ngẽxguma Yerucharéüwa ngĩxũ tangexgu i ngẽma dïeru, na ngẽmaãcü nüxũ ticuèxüügüxũcèx ya tórü Cori, rü na guxãma nüxũ dauxũcèx na ñuxãcü taããcũma yigü rüngũxẽẽgüxũ. <sup>20</sup> Rũ ítayaga i ngẽma taeneẽ, erü tama tanaxwèxe i texé toxũ tixu i yixcama ngĩxcèx i ngẽma tacü i dïeru i taeneẽgüçèx ngĩxũ inutaquéxegüçü. <sup>21</sup> Erü tama Tupanapéxewaxicatama tanaxwèxe na meã tanaxüxũ, natürü guxũ i duũxũgüpéxewa rü ta tanaxwèxe na meã tanaxüxũ. <sup>22</sup> Rũ Titumaã rü ngẽma to i taeneẽmaã petanüwa tanamu i wüxi i to i taeneẽ i toxũ nüxũ dauxẽxũ na aixcũma nüxũ nangúchaũ na naxüãxũ i Tupanaãrũ puracü. Rũ ñuxma rü yexeraãcü petanüwa naxüxchaũ i nümax, erü nüxũ nacuèx na ñuxãcü pema rü taããcũma togüxũ na perüngũxẽẽgüchaũxũ. <sup>23</sup> Rũ ngẽxguma texé pexna caxgu na texe yĩxũ ya Titu, jrü tũmamaã nüxũ pixu na nüma rü chomüçü ya wüxiwa chomaã pexcèx puracüçü na yĩxũ! Rũ ngẽma taxre i togü i namüçügü, rü ngẽma nixĩ i yatügü i guxũma i yaxõgüxũ nüxũ unetagüxũ na Cristuarü puracü naxügüxũcèx. Rũ nümagü rü aixcũma norü maxũmaã Cristuxũ nicuèxüügü. <sup>24</sup> Rũ ngẽmacèx chanaxwèxe i ngẽma taeneẽgüxũ nüxũ



pedauxēē na aixcūma nūxū pengechaũgūxū, na guxūma i yaxōgūxū nūxū cuèxgūxūcèx i ngēmachiga. Rū ngēmaācū guxūma i ngēma yaxōgūxū tá nūxū nacuèxgū na aixcūma yīxū i ngēma mexū i ore i pechiga namaā nūxū tixuxū.

## 9

*Yema dīēru ga yema togū ga yaxōgūxūcèx ngīxū inu-taquéxecūchiga*

<sup>1</sup> Rū taxucèxma tūxcūū pexcèx chanaxūmatū ngīchiga i ngēma dīēru i ngīxū penutaquégūcū naxcèx i ngēma taeneēgū i yaxōgūxū i Yudéaanewa ngēxmagūxū. <sup>2</sup> Erū marū nūxū chacuèx rū perū ngúchaūmaā ipenaxā i ngēma dīēru. Rū guxūguma taāēācūma ngēma yaxōgūxū i Machedóniāānewa ngēxmagūxūmaā nūxū chixu na ñuxācū i pema i Acayaanewa ngēxmagūxe rū naī ya tauncūgutama marū ípememarexū na ngīxū ipexāgūxū i ngēma dīēru. Rū yema rümumaēxū ga yaxōgūxū ga Machedóniāānecūāx, rū yexguma nūxū naxīnūēgu na ñuxācū taāēācūma togūcèx ngīxū na ipexāgūxū i perū dīēru, rū nūmagū rū ta inanaxūgū na ngīxū inaxāgūxū. <sup>3</sup> Natūrū i ñuxma rū ngēma petanūwa chanamugū i ngēma taeneēgū na nūxū nadaugūxūcèx, na aixcūma yīxū i ngēma nūxū chixuxū i pechiga. Rū chanaxwèxe na aixcūma ípememarexū na ngīxū ipexāxū i ngēma dīēru, ngēma taeneēgūmaā nūxū chixuxūrū. <sup>4</sup> Erū ngēxguma chi ñuxre i taeneēgū i Machedóniāānecūāx rū ngūrūāchi chomaā petanūwa naxīxgu, rū tama chanaxwèxe na pexū na iyangauxū na tama aixcūma ípememarexū na ngīxū ipexāxū i ngēma dīēru. Rū toxū rū chi wūxi i ānexūchi

nixĩ, erũ marũchiréx namaã nüxũ tixu na ñuxãcü aixcũma ípememarexũ na ngĩxũ ipexãxũ i ngẽma dĩeru. Rũ maneca pexũ rũ chi ta wũxi i ãnexũchi nixĩ. <sup>5</sup> Rũ ngẽmacèx nixĩ i chauxcèx namexũ na naxcèx íchaçaxũ i ngẽma taeneëgũ na nüxĩra petanũwa naxĩxũcèx rũ nümatama pexũ yanangũxẽëgũxũcèx na ngĩxũ penu-taquéxegũxũcèx i ngẽma dĩeru ga ũpamama ngĩxũ pixucũ. Rũ ngẽmaãcü aixcũma tá ímемare i ngẽma dĩeru i ngẽxguma ngẽma changuxgu. Rũ togũ tá nüxũ nadaugũ na aixcũma perũ ngũchaũmaã yĩxũ na ngĩxũ ipexãgũxũ rũ tama aũãcüma na yĩxũ. <sup>6</sup> ¡Rũ nüxna pecuèxãchie i ngema dexa i ñaxũ:

“Rũ yíxema noxretama i nanetũchire itoxe, rũ noxretama i norũ o tayaxu. Natũrũ yíxema muxũ i nanetũchire itoxe, rũ muxũma i norũ o tayaxu”, ñaxũ! <sup>7</sup> Rũ wũxichigũ tanaxwèxe na ngĩxũ itaxãxũ i ngẽma ngĩgu tarũxĩnũcü na ñuxre ngĩxũ itaxãxãxũ. Rũ tama name i aũãcüma ngĩxũ itaxã rũ éxna texé tũxũ muãcüma ngĩxũ itaxã. Erũ Tupana rũ nüxũ nangechaũ i ngẽma duũxũ i taãëãcüma ngĩxũ ixãxũ. <sup>8</sup> Rũ Tupanaméxẽwa nangẽxma na poraãcü pexna naxããxũcèx i guxũma i mexũ i pexũ taxuxũ, na guxũguma pexũ nangẽxmaxũcèx i ngẽma penaxwèxexũ rũ naetũ na pexũ íyaxũxũcèx na togũxũ namaã perũngũxẽëgũxũcèx. <sup>9</sup> Tupanaãrũ ore i ũmatũxũwa rũ ñanagũrũ:

“Yima yatũ ya mecũ rũ norũ ngũchaũmaã meã inanaxã nüxna i ngẽma duũxũgũ i taxuũma nüxũ ngẽxmaxũ. Rũ Tupana rũ tá guxũgu nüxna nacuèxãchi na ñuxãcü namecũmaxũ i nümax”,

ñanagürü. <sup>10</sup> Tupana nixĩ ya tũxna naxãcü ya nanetũchire na inatoxũcèx, rü tũxna naxãcü i õna na nangóxũcèx. Rü nüma tá nixĩ i pexna naxããxũ ya guxũnema ya nanetũchire ya penaxwèxene na ipenatoxũcèx. Rü nüma tá nanaxũxèẽ rü nanayaxèẽ ya yima nanetũchire. Rü tá nanamuxèẽ i norü o, na muxũchixũ nawa peyaxuxũcèx na ngẽmamaã togũxũ perũngũxèẽgũxũcèx. <sup>11</sup> Rü ngẽmaãcü i pema rü tá pexũ nangẽxma i guxũma i mexũ na tauxchaãcüma nüxũ perũngũxèẽgũxũcèx i togü. Rü ngẽxguma ngẽma togü i taeneẽgũxũtawana ngĩxũ tangegũgu i ngẽma dĩeru i naxcèx ngĩxũ ipexãcü, rü nümagü rü tá poraãcü Tupanana moxè naxãgü ngixcèx. <sup>12</sup> Erü ngẽxguma nüxna ngĩxũ taxãxgu i ngẽma dĩeru i nüxũ ngĩmaã perũngũxèẽgũcü i ngẽma taeneẽgü, rü tama țacü i nüxũ taxuxũcèxicatama ta nixĩ, natürü naetü i nümagü i taeneẽgü rü perü ãmaregagu tá poraãcü Tupanana moxè naxãgü. <sup>13</sup> Rü nümagü i ngẽma taeneẽgü rü tá Tupanaxũ nicuèxũũgü, erü ngẽma perü ãmaremaã tá nüxũ nüxũ pedauxèẽ na aixcüma naga pexĩnüèxũ i Cristuarü ore i mexũ. Rü nümagü rü tá Tupanana moxè naxãgü naxcèx i ngẽma perü ãmare i perü ngũchaũmaã nüxna rü guxũma i yaxõgũxũna pexãgũxũ. <sup>14</sup> Rü ngẽxgumarũũ i ngẽma taeneẽgü rü tá poraãcü pexcèx nayumũxègü, erü pexũ nangechaũgü. Rü tá Tupanana moxè naxãgü naxcèx na ñuxãcü nüma ya Tupana poraãcü pexũ nangũxèẽxũ na yemaãcü pexũ natauxchaxũcèx na nüxũ perũngũxèẽgũxũ. <sup>15</sup> Rü ngẽmacèx i ñuxma rü Tupanana moxè taxã, yerü tũxna nanamu ga Nane na tórü ãmare yĩxũcèx. Rü nataxuma i ore i nagu mexũ na nüxũ ixuxũcèx na ñuxãcü namaã itaãgũxũchixũ i ngẽma ãmare.

## 10

*Pauruarü ore rü aixcúma nixĩ yerü Tupana nixĩ ga nüxna ägacü*

<sup>1</sup> Rü ñuxma rü yema Cristu yaxna tamaã naxĩnũxũrũũ rü tamaã namecũmaxũrũũ, rü choma rü ta pemaã yaxna chaxĩnüãcũma rü pemaã chamecũmaãcũma pexũ chacèxũ na chauga pexĩnüëxũcèx. Erü nümaxũ i duũxũgü rü nüxũ nixugü na pexũ chamuũxũ ega pexũtawa changëxmagu natürü ngëxguma pexna chayaxũgu rü tama pexũ chamuũ. <sup>2</sup> Natürü ngëxguma ngema petanüwa chaxũxgu, rü chierü natauxguma na tacücèx namaã chaporagaxũ rü na chanaxucuxèxũ i ngëma duũxũgü i petanüwa toxũ ixuxũ na ñoma tama yaxögüxũrũũ na tamaxèxũ. Erü choma rü íchamemare na namaãxũchi na chidexaxũ. <sup>3</sup> Rü aixcũma woo duũxũgü tixĩgü natürü tama ñoma i naanecũãxrxũxũ togü tadaí i ngëxguma ítanapoxũgu i Tupanaarü ore. <sup>4-5</sup> Erü ngëma toxne i namaã ítanapoxũxũ i Tupanaarü ore rü tama ñoma i naãnecũãx namaã äxnexũ nixĩ. Erü toma rü toxũ nangëxma i Tupanaarü pora na ngëmamaã itayanaxoxèëxũcèx i Chatanaarü pora. Rü ngëmaãcü itayanaxoxèë i guxũma i chixexũ i ore i Tupanaxũ namaã yaxugügüxũ i duũxũgü. Rü ngëmaãcü itayanaxoxèë i guxũma i Tupanaarü uwanügüarü ore i nügü namaã yacuèxũũgüãcũma duũxũgümaã nüxũ yaxugügüxũ na tama Tupanaãxũ yaxögüãxũcèx. Rü guxũma i tacü i nagu naxĩnüëxũ i ngëma duũxũgü i chixexũ, rü Cristuna tanaxuaxũ na nüma namaã inacuáxũcèx. <sup>6</sup> Rü wüxicana marü meã Cristuga pexĩnüëgu, rü toma rü ítamemare na tüxũ tapoxcuexũ ya guxãma ya texé ya tama naga ñnüëxè

i Cristuarü ore. <sup>7</sup> Pema rü norü düxétüxünewaxicatama nixĩ i penangugüxü i wüxi i duüxü. Natürü ngëxguma texé tügü cuèxgu na Cristuarü duüxü tĩxü, rü name nixĩ i nüxü tacuèx na toma rü ta tümarüü Cristuarü duüxügü tixĩgüxü. <sup>8</sup> Rü woo írarüwa chanangupetüxë na chaugü chicuèxüüxü namaã i ngëma na Tupana toxü muxü, natürü taxucèxma naçcèx chaãane. Erü aixcüma Cori nixĩ ya toxü mucü na pexü tarüngüxëëgüxücèx na yexeraãcü meã peyaxögüxücèx. Rü tama țacü rü chixexügu pexü na tayixëxücèx nixĩ i toxü namuxü. <sup>9</sup> Rü tama chanaxwèxe i nagu perüxĩnüë na pexü íchabaixgüchaüxü namaã i ngëma poperagü i pexcèx chaxümatüxü. <sup>10</sup> Erü nümaxü i duüxügü rü nüxü nixugü na chorü poperawaxicatama pexü íchabaixgüxü, natürü chomaxüchi pexütawa changexmagu rü tama aixcüma nüxü chacuèx na ñuãcü mea chidexaxü na ngemaãcü chauga pexü chaxĩnüexëxücèx, ñaxümaã choxü nixugüe. <sup>11</sup> Natürü texe ya ngemaãcü idexáxe rü tanaxwèxe i nagu tarüxĩnü rü ngëma pexna tayaxüguãcüma torü poperawa pemaã nüxü tixuxürüü tátama tixĩgü i ngëxguma petanüwa tangëxmagügu. <sup>12</sup> Toma rü tama tanaxwèxe i namaã togü tawüxiguxë rü éxna nagu togü tangugü i ngëma duüxügü i nügütama icuèxüügüxü. Nümagü rü nügütama nawomüxëëgü, erü nügümaã nügü nawüxiguxë rü nügügutama nügü nangugü. <sup>13</sup> Natürü toma rü tama togü namaã ticuèxüügü i ngëma yaxögüxü i tama Tupana toxmëxwa ngëxmagüxëxü. Yerü Tupana nixĩ ga tomaã nüxü ixucü na ngextá nanaxwèxexü na tapuracüexü. Rü nüma nixĩ ga noxri Corítuwa ga petanüwa toxü nangugüxëxü na pemaã nüxü tixuxücèx ga norü ore. <sup>14</sup> Rü yemaãcü toxira nixĩ ga noxri petanüwa tangugüxü

na pemaã nüxũ tixuxïcèx ga yema Cristuarü ore. Rü ngëmacèx i ñuxma na petanüwa taxĩxũ, rü tama tanangupetüxëë ga yema Tupana tomaã nüxũ ixuxũ, yerü nüma nixĩ ga toxũ namuxũ na pexũ tarüngũxëëgüxïcèx. <sup>15</sup> Rü ngëmacèx tama togüarü puracümaãmare nixĩ i togü ticuèxüügüxũ. Rü tama nüxũ tachopetüchaũ i ngëma Tupana tomaã nüxũ ixuxũ na pexũ tangúexëëxũ. Natürü ngema pexũ tanaxwaexũ nixĩ na yexeraãcü nüxũ pecuáxũ i Tupanaarü ore na ngemaãcü yexera peyaxögüxïcèx. <sup>16</sup> Rü ngëxguma marü petanüwa tangugüguwena rü tanaxwèxe i ngëma duüxügü i perü yéamaxüra ngëxmagüxũ i ngextá taguma texé nüxũ íixuxüwa taxĩ na ngëmamaã rü ta nüxũ tixuxïcèx i ore i mexũ. Erü tama tanaxwèxe i togüarü puracümaã togü ticuèxüügü. <sup>17</sup> Erü Tupanaarü ore i ümatüxüwa rü ñanagürü:

“Rü ngëxguma texé tügü icuèxüüchaũgu, rü name nixĩ i tórü Corixũ ticuèxüü, erü nüma nixĩ i tüxũ nangüxëëxũ”, ñanagürü i ngëma ore. <sup>18</sup> Erü ngëma yatü i aixcüma Tupanapéxewa mexũ rü tama nügütama nicuèxüü. Natürü ngëma yatü i tórü Cori nüxũ icuèxüüxũ nixĩ i aixcüma Tupanapéxewa mexũ.

## 11

*Pauru rü nüxũ nixuchiga ga yema orearü uruügüneta ga tama Tupana imugüxũ*

<sup>1</sup> Rü ñuxma i ngëma tá pemaã nüxũ chixuxũ, rü bexmana pexcèx rü wüxi i ngëãëmare nixĩ, natürü chanaxwèxe i choxũ iperüxĩnüëmare rü yaxna chomaã

pexĩnüē. <sup>2</sup> Erü Tupana pexũ inuxũürũ pexũ chinuxũ. Erü chaugagu nixĩ i Cristuaxũ peyaxögũ, rü marü Cristuna pexũ chaxuaxũ na noxrüicatama pixĩgũxũcèx. Rü ngēmacèx chanaxwèxe i ngearü chixexũãē Cristuxũ pexũ chawéx ñoma wüxi i pacü i taguma yatixũ cuèx-cürũ. <sup>3</sup> Natürü chaxoegaãē rü yema äxtape norü do-ramaã Ebaxũ na womüxèxürũ, ngürüächi tá ta texé pexũ tawomüxèē, na nüxũ perüxoèxũcèx na Cristugu perüxĩnüèxũ rü naxcèicatama na pemaxèxũ. <sup>4</sup> Erü pema rü tauxchaäcü nixĩ na pexũ nawomüxèègũ. Rü ngëxguma Ínangügü i duũxũgü i pemaã nüxũ ixuxũ i to i Ngechuchuchiga ya tama yima toma nüxũ tixuchigacü, rü pema rü nüxũ peyaxögü i ngēma duũxũgü. Rü pema rü taãèäcüma penayaxu i to i naãē i tama Tupanaãē i Üünexũ ga marü peyaxuxũ ixixũ. Rü peyaxögü i to i ore i tama Tupanaärü ore i mexũ ga noxri peyaxuxũ ixixũ. <sup>5</sup> Dücèx, rü woo nawe perüxĩxgu i ngēma togü i orearü uruũgüneta, natürü chauxcèx rü taxuwama choxũ narüyexeragü. <sup>6</sup> Rü woo tama choxũ nangëxmagu i tauxcha na duũxũgüpéxewa chidexaxũ, natürü aixcüma meã nüxũ chacuèx i ngēma nachiga chidexaxũ. Rü ngēma rü guxũma i torü puracüwa marü pexũ nüxũ tadauxèē i guxũguma. <sup>7</sup> ¿Pexcèx rü chixexũ pemaã chaxü ga yexguma chaugü Ícharüxíragu na pexũ chataxèèxũcèx rü choxméxmaã chapuracügu na ngetanüäcüma pemaã nüxũ chixuxũ ga Tupanaärü ore i tüxũ maxèèèxũ? <sup>8</sup> Rü aixcüma yema togü ga yaxögũxũ choxna ngĩxũ ägücü ga dīeru ngĩxũ chayaxu na yemamaã petanüwa chapuracüxũcèx rü pexũ charüngũxèèxũcèx.

<sup>9</sup> Rū yexguma petanūwa chayexmagu rū aixcūma choxú itaxu ga dīeru, natürü taguma texéna ngīxcèx chaca. Rū taeneëgü ga Machedóniãñewa ne īxū rū choxna ngīxū naxāgü ga yema choxú tauxcü. Rū yemaãcü tama pexūtawa ngīxcèx íchaca ga yexguma. Rū ñuxma rū ta tagutáma tacücèx pexna chaca. <sup>10</sup> Rū Cristu ya chowa ngexmacüégagu pemaã nüxū chixu i ngema na aixcūma ngetanüácūma petanūwa chapuracūxū. Rū ngema rū chorü taãxē nixī. Rū taxucürüwa texe i guxū i Acáyaanewa choxna tanayaxu i ngema taãxē.

<sup>11</sup> ¿Rū tacücèx yīxū i ngēmaãcü chidexaxū? ¿Éxna pexcèx rū tama pexū changechaūxūcèx yīxū i ngēmaãcü chidexaxū? Dücèx, pemaã nüxū chixu rū Tupana nüxū nacüèx na ñuxãcü aixcūma pexū changechaūxū.

<sup>12</sup> Natürü ngēma na ngetanüácūma pemaã nüxū chixuxū i ngēma ore, rū ngēmaãcü tá chanaxüecha na taxucürüwa chixri chauchiga yadexagüxūcèx i ngēma togü i orearü uruügüneta i nügü ixuxū na toxrūü naxügüãxū i Tupanaärü puracü. <sup>13</sup> Nümagü rū aixcūma orearü uruügüneta nixīgü, rū duïxügüxū nawomüxëëgü. Rū nümagü rū togu nügü nicuxgü, rū nügü nixugü na Cristu yamugüxū. <sup>14</sup> Rū ngēma rū taxucèxma namaã pebaixächiãëgü. Erü woo i Chataná rū ta rū Tupanaärü orearü ngeruügü i daxücūãx i yauracüxürüüãcü nügü nangoxëë. <sup>15</sup> Rū ngēmacèx woetama ngēmaãcü nixīgü i ngēma duïxügü i Chatanáãxū puracüexū. Rū nümagü rū duïxügü i mexū ügüxügu nügü nicuxgü. Natürü ngēma ngēmaãcü ixīgüxū, rū Tupana tá nanapoxcue naxcèx i ngēma chixexū i naxügüxū.

*Pauru rū yema puracü ga Ngechuchu nawa namuxüwa*



*ngúxǔ ninge*

<sup>16</sup> Rǔ wena pemaã nǔxǔ chixu rǔ tama chanaxwèxe i nagu perǔxǎnǔē na wǔxi i ãũãēxǔ chíxǔ. Natǔrǔ ngēxguma chi ngēmaãcǔ chomaã nagu perǔxǎnǔēgu, rǔ tama chanaxwèxe i choxna penachuxu na ñoma wǔxi i ãũãēxǔrǔũ chaugǔétǔwa chidexaxǔ, na ngēmaãcǔ choma rǔ ta írarǔwa chaugǔtama chicuèxǔxǔcèx. <sup>17</sup> Rǔ ñuxma na chaugǔétǔwa chidexaxǔ rǔ ngēma rǔ tama tǔrǔ Coriarǔ mu ñixǐ. Natǔrǔ ñoma wǔxi i ãũãēxǔ nǔgǔ icuèxǔxǔrǔũ nixǐ i chidexaxǔ. <sup>18</sup> Rǔ ñuxma na nangēxmaxǔ i muxǔchixǔ i duǔxǔgǔ i ñoma i naãnewa nǔgǔ icuèxǔxǔgǔxǔ, rǔ choma rǔ tá ta írarǔwa chaugǔ chicuèxǔ. <sup>19</sup> Pema rǔ nagu perǔxǎnǔē rǔ nǔxǔ cuèxǔchigǔxǔ pixǐgǔ. Natǔrǔ taãēãcǔma yaxna namaã pexǎnǔē i ngēma duǔxǔgǔ i tama naãēxǔ icuáxǔ. <sup>20</sup> Rǔ yaxna namaã pexǎnǔē i ngēma duǔxǔgǔ i nǔgǔxǔ pexǔ puracǔexēxǔ, rǔ ngēma ngetanǔãcǔma pexǔ puracǔexēmarexǔ, rǔ ngēma pexǔ womǔxēēgǔxǔ, rǔ ngēma chixri pexǔ yaxgǔxǔ, rǔ ngēma pemaã guxchigagǔxǔ. <sup>21</sup> Rǔ woo wǔxi i ãnexǔchi nixǐ na pemaã nǔxǔ chixuxǔ, natǔrǔ chauxcèx rǔ tama aixcǔma pexǔ nǔxǔ tadauxēē ga torǔ pora ga yexguma petanǔwa tayexmagǔgu. Natǔrǔ ñuxma na tama namuǔēxǔ na nǔgǔ yacuèxǔxǔgǔxǔ i ngēma togǔ i duǔxǔgǔ, rǔ choma rǔ ta taxucèxma chamuǔ na chaugǔétǔwa chidexaxǔ woo pexcèx rǔ taxuwama namexgu i ngēma nǔxǔ chixuxǔ. <sup>22</sup> Nǔmagǔ rǔ nǔgǔ yaxugǔgu rǔ Yudǔgǔ nixǐgǔ. Natǔrǔ choma rǔ ta Yudǔ chixǐ. Rǔ nǔmagǔ nǔgǔ yaxugǔgu rǔ Iraétanǔxǔgǔ nixǐgǔ. Natǔrǔ choma rǔ ta rǔ Iraétanǔxǔ chixǐ. Rǔ nǔmagǔ rǔ nǔgǔ yaxugǔgu rǔ Abráũtanǔxǔ nixǐgǔ. Natǔrǔ choma rǔ ta Abráũ-

tanüxũ chixĩ. <sup>23</sup> Nümagü rü nügü yaxugügu rü Cristu-axũ napuracüe. Natürü choma rü norü yexera Cristu-axũ chapuracü. Rü ngẽma ñachagürü pexũ woo pema nagu perüxĩnüẽgu na ñoma wüxi i ãũãẽxũrũũ chidex-axũ. Rü ngẽma duũxũgüarü yexera poraãcü Tupanaãxũ chapuracü. Rü norü yexera chapoxcu, rü norü yexera choxũ naçuaixgü ga duũxũgü. Rü muẽxpüxcüna rü ãücümaxũchixũwa chayexma rü wixguxüchi taèx choxũ nimèxgü. <sup>24</sup> Rü 5 éxpüxcüna nixĩ ga 39 ga çuaximaã choxũ napoxcu-güxũ ga chautanüxũgü ga Yudíugü. <sup>25</sup> Rü tomaẽxpüxcüna nixĩ ga naĩmaã choxũ naçuaixgüxũ, rü wüxicana ga nutamaã choxũ ínamuxũchigüxũ. Rü tomaẽxpüxcüna nixĩ ga guma wapuru ga nagu chixüxũne rü chomaã inanguxũ. Rü wüxicana ga yexguma chomaã inanguxgu ga wapuru rü wüxi ga chütaxũ rü wüxi ga ngunexũ chinge na taxũ ga taxtũarü ngãxütũgu mürape-waétũgu chatunagüãcüma chiwẽxẽxũ. <sup>26</sup> Rü poraãcü nu ne chanaxũ, rü poraãcü ãücümaxũwa chayexma yerü natũgü ga ãücümaxũgu chixũgü, rü ngítèèxgüxũ rü chixexũ chomaã naxüguçhaũ. Rü woo chautanüxũgü ga Yudíugütanüwa, rü woo yema duũxũgü ga tama Yudíugü ixĩgüxũtanüwa, rü woo ñãnegüwa, rü woo namagüwa, rü woo taxtü i taxũwa rü ãücümaxũwa chayexma. Rü yema duũxũgü ga chomücügüneta ixĩgüxũtanüwa rü ta ãücümaxũwa chayexma. <sup>27</sup> Rü poraãcü chataarü puracüãx, rü muxũchixũ ga guxchaxũgü choxũ nangupetü. Rü muẽxpüxcüna rü tama chape, rü chataiya, rü chiçawa. Rü muẽxpüxcüna rü tama chachibü, rü choxũ nanadeyu, rü choxũ nataxu ga chauxchiru. <sup>28</sup> Rü naetüwa i guxũma i ngẽma, rü guxũ i ngunexũgu rü chaxoegaã naxcèx i

guxũma i ngẽma yaxõgũxũ i guxũ i ãñewa ngẽxmagũxũ.  
<sup>29</sup> Rũ ngẽxguma chi texé tama poragu, rũ choxũ rũ ta nangux. Rũ ngẽxguma chi wũxie texéxũ pecadugu nguxẽẽgu, rũ chauãewa nangux i ngẽma. <sup>30</sup> Natürũ ngẽxguma chi chaugũ chicuèxũũchaũgu, rũ tá chaugũ chicuèxũũ naxcèx na duũxũgũ choxũ dauxũ na taxuwama chamexũ. <sup>31</sup> Rũ Tupana ya tórũ Cori ya Ngechuchu ya Cristunatũ ya mecũ na guxũguma nüxũ icuèxũũgũxũ, rũ nüxũ nacuèx na aixcũma yĩxũ i ngẽma nüxũ chixuxũ. <sup>32</sup> Rũ yexguma Damacuwa chayexmagu, rũ guma ãñeãrũ ãẽxgacũ ga Aretaarũ ngũxẽẽruũ, rũ norũ churaragũxũ namu na nüxna nadaugũxũcèx ga guma ãñeãrũ poxeguxũãrũ ããxgũ na choxũ yayauxgũxũcèx ga yexguma chi yéma íchaxũũxgu. <sup>33</sup> Natürũ yema ãñeãrũ poxeguxũãrũ ããxãcũwa rũ wũxi ga pexchigu choxũ ãnarũchũxũetaũgũ ga chomũcũgũ. Rũ yemaãcũ chiña naxchaxwa ga yema ãẽxgacũ.

## 12

*Tórũ Cori rũ Pauruxũ nangoxetũxẽẽ* rũ nüxũ nüxũ nacuèxẽẽ ga ãacũ ga èxũgũxũ

<sup>1</sup> Taxuwama name na texé tũgũ icuèxũũxũ. Natürũ tá pemaã nüxũ chixuama na ñuxãcũ tórũ Cori choxũ nangoxetũxẽẽxũ rũ ñuxãcũ choxũ nüxũ na nacuèxẽẽxũ ga ãacũ ga èxũgũxũ. <sup>2</sup> Rũ 14 ga tauncũ marũ nangupetũ ga na Tupana daxũgũxũ ga naãnewa ga nüma ínayexmaxũwa choxũ nagaxũ. Natürũ tama nüxũ chacuèx rũ chauãẽwaxicatama nixĩ ga yéma choxũ nagaxũ, rũ éxna guxũ ga chaxunemaã yĩxũ ga yéma choxũ nagaxũ. Rũ Tupanaxĩcatama nüxũ nacuèx i ngẽma. <sup>3-4</sup> Rũ aixcũma meãma nüxũ chacuèx na daxũgũxũ ga naãnewa choxũ nagaxũ ga Tupana, natürũ tama nüxũ chacuèx rũ guxũ

ga chaxunemaã yéma choxũ naga rü éxna tama. Rü Tupanaxĩcatama nixĩ ya nüxũ cuácü i ngẽma. Rü yéma nüxũ chaxĩnü ga ore ga êxũguxũ i guxũma i duũxũgũna chuxuxũ na nüxũ yaxugũxũ. <sup>5</sup> Rü choma rü chi name na chaugü naxcèx chicuèxüüxũ i ngẽma, natürü tãütãma ngẽmaãcü chanaxü. Erü ngẽma ngúxũ na chingexũ-maãxĩcatama tá nixĩ i chaugü chicuèxüüxũ. <sup>6</sup> Natürü ngẽxguma chi chaugü chicuèxüüchaũgu, rü tãü chima wüxi i ngẽãẽmare nixĩ i ngẽma, erü aixcüma nixĩ i ngẽma ore i nüxũ chixuxũ i chauchiga. Natürü tama chaugü chicuèxüü na taxúema nagu rüxĩnũxũcèx na ngẽma chowa nüxũ naxĩnüèxũ rü nüxũ nadaugũxũãrũ yexera chiĩxũ. <sup>7</sup> Natürü tórü Cori rü tama nanaxwèxe i poraãcüxüchima chaugü namaã chicuèxüüxũ ga yema êxũguxũ ga mexèchixũ ga choxũ nüxũ nacuèxèèxũ. Rü yemacèx chaxunewa nananguxèẽ ga wüxi ga choxũ ngúxũ ñoma wüxi ya tuxu chaxunewa ingaxixürüü. Rü yema rü ñoma wüxi ga Chatanáãrũ orearü ngeruürüü chauxütawa nangu na choxũ nachixewexũcèx na tama chaugü chicuèxüüxũcèx. <sup>8</sup> Rü tomaèxpüxcüna tórü Corina chaca na choxũ iyanaxoxèèãxũcèx ga yema choxũ ngúxũ. <sup>9</sup> Natürü nüma ya tórü Cori rü ñanagürü choxũ:

“Rü cuma nüxũ cucuèx na guxũguma cuxũ changechaũ, rü ngẽxĩcatama nixĩ i cunaxwèxexũ. Rü ngẽma duũxũgü i tama poraexũwa nixĩ i aixcüma chanangoxèèxũ i ñuxãcü na chaporaxũ”, ñanagürü choxũ. Rü ngẽmacèx chataãẽ ega tama chaporagu. Erü ngẽxguma tama chaporagu rü ngẽxguma nixĩ i chowa inawéãxũ i norü pora ya Cristu. <sup>10</sup> Rü ngẽma na Cristuxũ na changechaũxũgagu nixĩ i yaxna namaã chaxĩnũxũ ega

woo chaturagu rü woo ʔacü chomaã yaxugüegu i duũxũgü. Rü woo choxũ natauxgu i chorü ngẽmaxũgü, rü woo duũxũgü rü chowe yangẽxũtanügu, rü woo guxchaxũgü choxũ ngẽxmagu rü Cristucèx rü yaxna namaã chaxĩnü i guxũma i ngẽma. Erü ngẽxguma chaturagu, rü ngẽxguma nixĩ i yexeraäcü Cristu choxũ poraxẽexũ.

*Pauru rü naxcèx naxoegaã ga yema yaxõgũxũ ga Corĩtiuwa yexmagũxũ*

<sup>11</sup> Maneca ñoma wüxi i ãũãẽxũrüü chidexa, erü ngẽmaäcü chaugü chicuèxüü. Natürü pegagutama nixĩ i düxwa ngẽmaäcü chaugüétüwa chidexaxũ, yerü pema chi nixĩ ga choxũ picuèxüũgũxũ, rü tama i chomax. Rü woo taxuwama chame i chomax, natürü taxuwama choxũ narüyexeragü i ngẽma orearü uruũgüneta i nawe perüxĩxũ. <sup>12</sup> Rü yexguma petanüwa chayexmagu, rü yaxna pemaã chaxĩnüäcüma pexũ nüxũ chadauxẽẽ na aixcüma Cristu choxũ muxũ na nüxũ chixuxüçèx ga norü ore. Rü cuèxruũgümaã pexũ nüxũ chacuèxẽẽ ga yema. Rü pexũ nüxũ chadauxẽẽ ga taxũ ga mexũgü ga Tupanaärü poramaã üxũ. <sup>13</sup> Rü yexguma petanüwa chayexmagu rü pemaã chamecüma yema guxũma ga togü ga yaxõgũxũmaã na chamecümaxũrüütama. Natürü wüxiwaxicatama nixĩ ga íchatüxü yerü ga petanüwa rü tama ngĩxũ chayaxu ga díeru yema togü ga yaxõgũxũtanüwa ngĩxũ chayaxüürüü. Rü chanaxwèxe i choxũ nüxũ pengechaũ i ngẽma. <sup>14</sup> Rü ñuxma rü marü íchamemare na norü tomaẽxpüxcüna pexũ íchayadauxũ. Rü täütama ʔacüçèx pexna chayaca. Erü tama perü ngẽmaxũgüçèx petanüwa chaxũ, natürü pexcèxüchi nixĩ i ngẽma chaxũxũ. Pema rü chauxacügü pixĩgü i Tupanaärü orewa. Rü ngẽma

papá rü mamáãrü puracü nixĩ na naxãcügüna naxããxũ i ngẽma nüxũ taxuxũ. Rü tama naxãcügüarü puracü nixĩ na nanatüna rü naẽna naxãgüãxũ. <sup>15</sup> Rü choma rü íchamemare na chorü ngúchaũmaã pexcèx ichanaxãxũ i guxũma i tacü i choxũ ngẽxmaxũ rü woo chaugütama rü ta na ichaxãxũ na aixcüma meã peyaxõgüxücèx. Natürü chauxcèx rü ngẽxguma yexeraãcü pexũ changechaũgu, rü pema rü yexeraãcü nüxũ perüxoetanü na choxũ pengechaũxũ. <sup>16</sup> Rü nümaxũ i duũxügü i petanüwa, rü woo nüxũ nacuxgü na taguma tacücèx pexũtawa íchaçaxũ, natürü nümagü rü nüxũ nixugüama na pexũ chawomüxẽãcüma perü dĩeru ngĩxũ chayaxuxũ. <sup>17</sup> ¿Éxna pema nagu perüxĩnüëgu rü yema duũxügü ga petanüwa chamugüxũwa pexũ chawomüxẽ? <sup>18</sup> Rü Titumaã nüxũ chixu na petanüwa íyadauxücèx. Rü namaã yéma chanamu ga yema to ga taeneẽ. ¿Éxna pema nagu perüxĩnüëgu ga Titu rü pexũ yéma nayawomüxẽ? ¿Tama éxna aixcüma yĩxũ na chauxrüũ meã na namaxũxũ rü chauxrüũ mexũgu naxĩnüxũ ga Titux? <sup>19</sup> Bexmana pema tá nagu perüxĩnüë rü ngẽmaãcü tidexagü, erü togüétüwatama tachogüchaũ. Natürü, Pa Chaueneëgü ya Pexũ Tangechaũgüex, rü Tupanapéxewa rü Cristuégagu nixĩ i tidexagüxũ na yexeraãcü meã Tupanaãxũ peyaxõgüxücèx rü yexeraãcü meã na pemaxëxücèx. <sup>20</sup> Erü chaxoegaã rü ngẽxguma wena pexũ íchayadèuxgu, rü ngürüachi tama choma chanaxwèxexũãcüma ípemaxë, rü ngẽmacèx i pema rü tãütáma chomaã petaãëgü. Rü chaxoegaã erü ngürüachi tá pexũ ichayangau na pegüchi ípexaixũ, rü pegüarü

ngẽmaxũcèx pixãũxãchigũxũ, rü pegümaã penuẽxũ, rü pegüguxicatama íperũxĩnũẽxũ, rü pexoregütèèxgũxũ, rü toguãxũ pixuxũ, rü pegü picuèxũũgũxũ, rü chixexũ ípexüexũ rü ngẽmaãcü chixri ípemaxẽxũ. <sup>21</sup> Rü chaxoegaãẽ rü ngẽxguma wena petanüwa chaxũxgu, rü ngürüãchi Tupana rü pegagu tá choxũ naxãnexẽẽ. Rü ngürüãchi ngechaũ tá choxna pexã, erü muxẽma i petanüwa rü marü ñuxgumama pecadu taxügüecha, rü tama nüxũ tarüxoechaũ na Tupanapêxewa chixexũ taxügũxũ rü naĩ i ngemaãmare na tamaxẽxũ rü guxũma i togü i chixexũ na taxügũxũ.

## 13

*Pauru nayaxucuxẽ* ga yema yaxõgũxũ ga Corítiucũăx rü ñuxũchi nüxũ narümoxẽ

<sup>1</sup> Ñuxma rü norü tomaẽxpüxcüna tá nixĩ na petanüwa chaxũxũ. Rü Tupanaãrũ ore rü tamaã nüxũ nixu rü ngẽxguma texé chixexũ üxgu rü taxre rü éxna tomaẽxpüx i duũxũgü nüxũ daugügu rü nüxũ yaxugügu na aixcüma yĩxũ, rü aixcüma tá poxcu tümamaã taxuegu ya yíxema chixexũ üxe. <sup>2</sup> Rü ngẽmacèx i pema i üpamamatama pecadu ügüechaxe rü guxãma i pema ya chixri maxẽxẽ, rü ñuxma na woo pexna chayaxũgũxũ rü wenaxãrũ pexna nüxũ chacuèxãchixẽẽ rü ngẽxguma tá ngẽma chaxũxgu rü aixcüma tá chanamexẽẽ i guxũma i ngẽma chixexũ i petanüwa ngẽxmaxũ, rü tãütãma chanangupetüxẽẽmare i ngẽma. <sup>3</sup> Rü pema na naxcèx iperüdaunũxũ na Cristu chowa idexaxũ, rü ngẽxguma ngema chaxũxgu, rü ngẽxguma tá nixĩ i nüxũ pedauxũ na aixcüma chowa na yadexaxũ ya Cristu. Rü nüma ya Cristu rü chowa tá pexũ nüxũ nadauxẽẽ na tama naturaxũ natürü aixcüma

yanguxêãxũ i norü ore rü tüxũ napoxcuexũ ya yíxema chixexũ ügüxe. <sup>4</sup> Rü aixcüma nixĩ ga Cristu ga ñoma wüxi ga duũxũ i turaxürüü nügü yaxixêãxũ ga yexguma curuchawa yapotagu. Natürü i ñuxma rü Tupanaärü poragagu namaxũ. Rü ngëxgumarüü i toma na norü duũxügü tixigüxũ, rü taturae i toxonewa. Natürü ngëma na norü duũxügü tixigüxũ, rü Tupanaärü poragagu tá tamaxê na pexũ tarüngüxêãgüxũcèx. <sup>5</sup> Rü name nixĩ i pegütama pengugü na nüxũ pecuáxũcèx ngoxi aixcüma meã peyaxögü. Rü name nixĩ i pegü pengugüarü maxũăx rü ngoxi Tupanapêxewa pime. ¿Tama êxna nüxna pecuèxâchie na Ngechuchu ya Cristu rü pewa nangëxmaxũ ega aixcüma peyaxögügu? <sup>6</sup> Rü chierüna nüxũ pecuèxgu na toma rü tama orearü uruũgünetamare na tixigüxũ. <sup>7</sup> Rü Tupanana naxcèx taca na taxuũma i chixexũ na pexügüxũcèx. Rü tama duũxügüpêxewa togü ítarütägüxũcèx nixĩ na ngëmaäcü tayumüxêgüxũ. Natürü Tupanana naxcèx taca i ngëma na aixcüma meã naxcèx pemaxêxũcèx woo duũxügü nagu rüxĩnüêgu na toma rü ítatüemarexũ. <sup>8</sup> Toma rü taxucürüwama chixri nachiga tidexagü i Tupanaärü ore i aixcüma ixixũ, erü toma rü naetüwa tachogü i ngëma ore. <sup>9</sup> Rü tá tataãêgü ega aixcüma peporaegu i perü maxüwa rü ngëmacèx natauxgu i ñacüçèx pemaã na taporagaexũ. Rü Tupanana tá naxcèx tacaama na pexũ naporaexêãxũcèx i perü maxüwa na düxwa aixcüma mexũ i norü duũxügü na pixigüxũcèx. <sup>10</sup> Rü naxüpa na pexũ na íchayadauxũ nixĩ i pexcèx chanaxümatüxũ i ñaã popera, na ngëxguma ngëma changuxgu rü nataxuxũcèx i ñacüçèx pemaã na chaporagaxũ. Erü tórü Cori choxũ namu na pexũ charüngüxêãxũcèx na yexeraäcü meã peyaxögüxũcèx,



rü tama chixexũ pemaã na chaxüxüçèx nixĩ i choxũ namuxũ. <sup>11</sup> Rü ñuxma na ichayacuèxèxũ i ñaã popera, Pa Chaueneëgüx, rü chanaxwèxe i meã pexũ naxüpetü rü naxcèx pedau na ñuxãcü aixcüma meã Tupanacèx pemaxèxũ. Rü name nixĩ i pegü petaãxèxègü rü wüx-ígu perüxĩnüè rü meã yaxna pegümaã pexĩnüè rü aixcüma pegü pengechaũgü. Rü nüma ya Tupana ya tüxũ ngechaũcü rü tüxũ rüngüxümüèxèècü, rü guxũgutáma pemaã inarüxãũx. <sup>12</sup> Rü chanaxwèxe i wüxichigü i pema rü pegü pengechaũgüácüma pegü perümoxègü. <sup>13</sup> Rü guxũma i togü i taeneëgü i yaxögüxũ rü pexũ narü-moxègü. <sup>14</sup> Rü ñuxma rü chanaxwèxe i tórü Cori ya Ngechuchu ya Cristu pexũ narüngüxèè, rü Tanatü ya Tupana rü pexũ nangechaũ, rü Naã i Üünexũ rü guxũguma pemaã inarüxãũx.

Rü nuãma pexna,  
Pauru

Tupanaarü Ore i Tóriu Cori ya Ngechuchu ya Cristuchiga  
New Testament in Ticuna (PE:tca:Ticuna)

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

### Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

- You must give Attribution to the work.

- You do not sell this work for a profit.

- You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ticuna

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

- You include the above copyright and source information.

- You do not sell this work for a profit.

- You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective

copyright owners.

2014-04-30

---

PDF generated using Haiola and XeLaTeX on 14 Jun 2022 from source files dated 28 May 2022

9d5dc22a-30be-5d26-85a9-76047f4c89e6